

MESYUARAT KEDUA, PENGGAJAL KEEMPAT
PARLIMEN KEEMPAT BELAS
2021

HARI KHAMIS : 11 NOVEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 5, 10 HINGGA NO. 41)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATO' SRI AZALINA OTHMAN SAID
(PENGGERANG)**

TARIKH : 11 NOVEMBER 2021 (KHAMIS)

SOALAN

DATO' SRI AZALINA OTHMAN SAID [PENGGERANG] minta **MENTERI DALAM NEGERI** menyatakan pendirian Kerajaan dalam isu penahanan kanak kanak di Malaysia, ditambah pula banyak negara memastikan *alternative to detention for children* ketika pandemik ini.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri melalui Jabatan Imigresen Malaysia (JIM) komited dalam memastikan kebajikan dan keselamatan semua tahanan depot imigresen termasuk kanak-kanak. Sehingga 11 Oktober 2021, terdapat 1,475 orang (7.5%) tahanan kanak-kanak daripada keseluruhan 19,722 orang tahanan di semua depot imigresen dan depot imigresen sementara di seluruh negara.

Antara langkah yang diambil oleh Kerajaan dalam menangani isu ini termasuk cabaran perkembangan kesihatan minda kanak-kanak dalam tahanan imigresen adalah melalui pelaksanaan projek rintis *Alternative to Detention* (ATD) bagi kanak-kanak tanpa penjaga dan terpisah yang diterajui Kementerian Pembangunan Wanita, Keluarga dan Masyarakat.

Projek rintis ATD yang dicadangkan untuk pelaksanaan di Malaysia merupakan satu penjagaan alternatif kepada kanak-kanak terpisah dan tanpa penjaga (*unaccompanied and separated*) di depot imigresen di mana kanak-kanak tersebut akan mendapat perlindungan dan perkhidmatan sokongan melalui pemeliharaan berasaskan keluarga untuk memenuhi keperluan asas seorang kanak-kanak. Kementerian Pembangunan Wanita, Keluarga dan Masyarakat telah menyediakan prosedur operasi standard bagi pelaksanaan projek rintis ini dan Kementerian Dalam Negeri melalui Jabatan Imigresen Malaysia komited dalam memberikan kerjasama bagi memastikan kelancarannya.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN SYED IBRAHIM BIN SYED NOH
(LEDANG)**

TARIKH : 11 NOVEMBER 2021 (KHAMIS)

SOALAN

TUAN SYED IBRAHIM BIN SYED NOH [LEDANG] minta **MENTERI
DALAM NEGERI** menyatakan :-

(a) peruntukan yang telah digunakan bagi membaik pulih dan membangunkan semula infrastruktur balai polis termasuk kuarters dan pondok polis; dan

(b) faktor-faktor yang menyebabkan isu penyenggaraan balai polis ini tidak selesai dan jangkaan masa perkara ini dapat diselesaikan .

JAWAPAN

Tuan Yang Di Pertua,

Kerajaan amat prihatin dan komited untuk menyediakan fasiliti yang lebih baik kepada anggota PDRM dalam memastikan keselesaan dan keselamatan mereka sentiasa terjamin.

Di bawah *Rolling Plan* Pertama (RP1) Rancangan Malaysia Kedua Belas (RMKe-12), peruntukan keseluruhan sebanyak RM 59.09 juta telah diluluskan melalui perbelanjaan pembangunan bagi kerja-kerja pembaikan premis PDRM seperti berikut:

1. Perbelanjaan Pembangunan (DE) di bawah Program Strategik Memperkasa Rakyat dan Ekonomi (PEMERKASA) untuk pembaikan premis pejabat dan kuarters PDRM sebanyak RM 50 juta; dan
2. Peruntukan khas pembaikan 8 cerun di premis PDRM berjumlah RM 9.09 juta.

Sebelum itu, di bawah Rancangan Malaysia Kesebelas (RMK-11) pula, peruntukan keseluruhan sebanyak RM 448.37 juta telah diluluskan melalui perbelanjaan pembangunan bagi kerja-kerja pembaikan premis PDRM. Perincian peruntukan yang diluluskan adalah seperti berikut:

1. Perbelanjaan Pembangunan sebanyak RM167 juta bagi pembaikan pejabat dan kuarters;
2. RM 122 juta bagi pembaikan lif;
3. RM 100.5 juta bagi pembaikan lokap, pos dan jeti di bawah Pakej Rangsangan Ekonomi (PRE) Prihatin;
4. RM 40 juta bagi pembaikan stor Jabatan Siasatan Jenayah (JSJ) dan Jabatan Siasatan Jenayah Narkotik (JSJN);

5. Peruntukan khas RM 11.3 juta bagi pembaikan di IPD Kajang dan Sepang; dan
6. RM 7.57 juta bagi pembaikan cerun di lima (5) lokasi premis PDRM.

Di bawah Perbelanjaan Mengurus (OE), PDRM telah menerima peruntukan sebanyak RM 43.5 juta pada tahun 2021, RM 65.3 juta pada tahun 2020 dan RM 57.84 juta pada tahun 2019 bagi kerja-kerja pembaikan premis PDRM.

Tuan Yang Di Pertua,

Berdasarkan *Building Management Budget (BMB)* oleh *Department of Housing Public Works* dari *Queensland Government Australia*, norma bagi keperluan pembaikan dan penyelenggaraan bangunan setahun adalah 1% - 4% daripada nilai aset semasa. Pada masa ini, nilai aset tak alih semasa PDRM mengikut Bahagian Perakaunan Akruan, KDN adalah bernilai RM45.68bilion.

Berdasarkan maklumat tersebut, keperluan sebenar peruntukan bagi kerja-kerja pembaikan dan penyelenggaraan aset tak alih adalah sekitar RM456.75juta hingga RM1.83bilion setahun. Namun, peruntukan tahunan yang dikhususkan kepada PDRM bagi tujuan pembaikan dan penyelenggaraan bangunan secara purata berjumlah RM 213.33 juta setahun adalah tidak mencukupi bagi menampung keperluan pembaikan premis. Kementerian memahami akan keperluan ini dan telah mengadakan perbincangan dengan Kementerian Kewangan untuk memberi tumpuan kepada penyelenggaraan premis berjadual (*Facilities Maintenance*) termasuklah di premis PDRM di bawah peruntukan yang akan datang.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : DATUK SERI DR. SHAMSUL ANUAR BIN HAJI
NASARAH [LENGGONG]**

TARIKH : 11 NOVEMBER 2021 (KHAMIS)

SOALAN

DATUK SERI DR. SHAMSUL ANUAR BIN HAJI NASARAH [LENGGONG] minta **MENTERI SUMBER MANUSIA** menyatakan langkah bagi merealisasikan sasaran pengurangan kebergantungan kepada pekerja asing dengan menggalakkan lebih banyak penyertaan warga tempatan dalam pasaran buruh.

JAWAPAN

Tuan Yang Di Pertua,

Dasar Kerajaan adalah untuk memberi keutamaan dalam pekerjaan kepada rakyat Malaysia terlebih dahulu. Kerajaan sentiasa berusaha untuk memastikan pekerja warganegara tidak dinafikan hak mereka untuk bekerja. Hanya jawatan-jawatan yang tidak dapat diisi oleh pekerja warganegara dalam sektor-sektor yang diluluskan sahaja dibenarkan untuk menggaji pekerja asing.

Penggajian pekerja asing hanya dibenarkan bagi jawatan tertentu dalam **enam (6) sektor formal** dan **satu (1) sektor informal** iaitu:

- (i) sektor pembinaan;
- (ii) pertanian;
- (iii) perladangan;
- (iv) perkilangan;
- (v) perlombongan dan pengkuarian;
- (vi) perkhidmatan (subsektor restoran (tukang masak), pembersihan dan pencucian, pulau peranginan, hotel, spa dan refleksologi, kedi (lelaki), pengendalian kargo (pelabuhan dan lapangan terbang) dan pembantu taman tema; dan
- (vii) pekhidmat domestik (sektor informal)

Selain itu, selaras sasaran dalam Rancangan Malaysia Ke-11 (RM Ke-11), iaitu memastikan penggajian pekerja asing tidak melebihi 15%, pelbagai usaha telah dilaksanakan oleh Kerajaan untuk mengurangkan kebergantungan terhadap pekerja asing dan menarik minat pekerja warganegara untuk memasuki pasaran kerja seperti berikut:

- (i) menggalakkan sektor-sektor yang berintensifkan buruh beralih kepada **penggunaan mekanisasi dan automasi**. Langkah ini dapat membantu negara mencapai sasaran melahirkan 35% pekerja mahir di Malaysia;
- (ii) **menetapkan ratio** pekerja warganegara dan pekerja asing bagi menjamin peluang pekerjaan kepada rakyat Malaysia.

Sebagai contoh, sektor perladangan (kelapa sawit), keluasan tanah 8 hektar untuk 1 pekerja asing dan getah pula keluasan tanah 4 hektar untuk 1 pekerja asing. Manakala, untuk sektor perkilangan, bagi syarikat dalam subsektor elektrik dan elektronik, nisbah kelayakan yang ditetapkan adalah 2 pekerja warganegara bagi 1 pekerja asing;

- (iii) **pelaksanaan Surat Aku Janji Majikan** (*Employers Undertaking*) mulai 1 Januari 2017 yang menghendaki majikan bertanggungjawab sepenuhnya terhadap pekerja asingnya. Tindakan ini bermula dari peringkat kemasukan, penggajian sehinggalah penghantaran pulang pekerja tersebut ke negara asal;
- (iv) **mengutamakan *exit policy*** penggajian pekerja asing dengan menyediakan pelan latihan kemahiran kepada pekerja warganegara; dan
- (v) **pembekuan pengambilan semua pekerja asing baharu** dari semua negara sumber ke Malaysia sehingga 31 Disember 2021.

Berdasarkan Statistik Tenaga Buruh Malaysia yang diterbitkan oleh Jabatan Perangkaan Malaysia (DOSM), kadar pengangguran pada September 2021 terus menurun sebanyak 0.1 peratus kepada 4.5 peratus berbanding 4.6 peratus pada Ogos 2021. Justeru itu, bilangan penganggur berkurangan sebanyak 19,200 orang daripada 748,800 orang pada Ogos 2021 kepada 729,600 orang pada bulan September 2021.

Walau bagaimanapun, penurunan ini bukanlah bermaksud kekosongan jawatan tersebut telah diisi oleh pekerja asing. Sebaliknya, memperlihatkan kategori penduduk bekerja sendiri seperti peruncit kecil, penjaja, penjual di pasar dan gerai telah memasuki pasaran buruh dan beroperasi semula dalam tempoh Pelan Pemulihan Nasional (PPN) selari dengan pembukaan semula lebih banyak aktiviti ekonomi untuk meneruskan operasi dengan pelanjutan tempoh waktu operasi perniagaan.

Berdasarkan data yang diperolehi, kebanyakan penganggur adalah terdiri daripada kalangan belia dan graduan universiti yang tidak berminat dan kurang sesuai untuk mengisi kekosongan jawatan sebagai pekerja am yang dikategorikan sebagai 3D (*dangerous, dirty and difficult*).

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN PRABAKARAN A/L
M PARAMESWARAN [BATU]**

TARIKH : 11 NOVEMBER 2021 (KHAMIS)

SOALAN

TUAN PRABAKARAN A/L M PARAMESWARAN minta **MENTERI PEMBANGUNAN LUAR BANDAR** menyatakan mengapa segala isu kebajikan dan isu berkenaan orang Asli harus melalui saluran JAKOA (Jabatan Kemajuan Orang Asli). Kebanyakan mereka masih terpinggir dari arus pembangunan dan kemajuan walaupun JAKOA menjadi satu agensi utama untuk kemajuan mereka sejak bertahun lama. Apakah peranan JAKOA yang sebenar untuk memajukan Orang Asli Semenanjung Malaysia.

JAWAPAN

Tuan Yang di-Pertua,

Sejarah JAKOA bermula pada bulan Disember tahun 1939 melalui Perak *Aboriginal Enactment* 3. Sungguhpun begitu penubuhan rasmi Jabatan Kemajuan Orang Asli ialah pada tahun 1954 menerusi Akta Orang Asli (Akta 134) yang memberikan perlindungan, kesejahteraan dan kemajuan kepada Orang Asli di Semenanjung Malaysia.

Untuk makluman Yang Berhormat Batu, kerajaan melalui Jabatan Kemajuan Orang Asli (JAKOA) akan meneruskan pelbagai program/projek dalam RMKe-12 (2021-2025) dalam usaha untuk memajukan masyarakat Orang Asli di Semenanjung Malaysia.

JAKOA merupakan Agensi bertanggungjawab dalam menjaga kebajikan, pendidikan dan sosio ekonomi masyarakat Orang Asli telah melaksanakan pelbagai program dan projek bagi meningkatkan taraf sosio ekonomi dan pendidikan agar setanding dengan lain-lain kelompok masyarakat di negara ini. Dengan peruntukan yang diluluskan oleh kerajaan, banyak program seperti bantuan pendidikan, kesihatan am, pembangunan modal insan dan infrastruktur telah dan akan dapat dilaksanakan pada masa depan.

Melalui kerjasama dengan pelbagai Agensi kerajaan yang lain, JAKOA juga bertindak sebagai medium penghubung atau pemudahcara di antara Orang Asli dengan pelbagai pihak sama ada melibatkan agensi-agensi kerajaan, Badan Bukan Kerajaan (NGO), pihak swasta mahupun orang perseorangan.

Sebagai contoh kerjasama erat dengan Kementerian Kesihatan Malaysia dan Bomba diadakan melalui bantuan kebajikan kepada pesakit di pedalaman dan perkhidmatan doktor udara. Manakala kerjasama dengan Kementerian Pendidikan Malaysia (KPM) dan Kementerian Pengajian Tinggi (KPT) menerusi program bantuan pendidikan kepada pelajar Orang Asli di sekolah rendah, sekolah menengah sehingga ke institusi

pengajian tinggi (IPT) dalam dan luar negara yang dilaksanakan setiap tahun.

Manakala kerjasama strategik bersama Kementerian Sumber Manusia khususnya dalam membuka peluang pekerjaan kepada belia/beliawanis Orang Asli, Jalinan kerjasama dengan Kementerian Komunikasi dan Multimedia dalam menyediakan liputan telekomunikasi di petempatan Orang Asli serta Kementerian Dalam Negeri khususnya dengan Jabatan Pendaftaran Negara dan Polis Diraja Malaysia melalui penubuhan pasukan khas Senoi Praaq telah memberikan manfaat yang besar kepada masyarakat Orang Asli.

Selain itu, JAKOA juga bertanggungjawab dalam memastikan pembangunan infrastruktur bagi masyarakat Orang Asli terus dijalankan. Pada tahun 2021, JAKOA telah diluluskan peruntukan pembangunan berjumlah RM102.7 juta bagi tujuan pelaksanaan 34 projek utama di perkampungan Orang Asli melibatkan projek bekalan air, elektrik dan infrastruktur seperti jalan raya, ameniti sosial, perumahan rakyat dan pembangunan bersepadu di Sungai Siput dan Gua Musang.

Bagi tujuan memperkasakan masyarakat Orang Asli, selain daripada bantuan pendidikan formal, JAKOA turut menyediakan platform pembelajaran sepanjang hayat melalui pendidikan prasekolah, sekolah komuniti dan pendidikan literasi fungsian serta program latihan kemahiran dan pembangunan usahawan kepada wanita, para belia dan beliawanis Orang Asli.

Selain itu juga, pelantikan Tok Batin oleh Menteri Pembangunan Luar Bandar merupakan satu usaha kerajaan bagi memperkasakan kepimpinan Orang Asli di peringkat akar umbi. Latihan khusus disediakan kepada kepimpinan yang baru dilantik untuk melengkapkan kemahiran asas dalam aspek pentadbiran, pengurusan dan pembangunan kampung.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH ROHANI BINTI HAJI
ABDUL KARIM [BATANG LUPAR]**

TARIKH : 11 NOVEMBER 2021 (KHAMIS)

SOALAN

DATO' SRI HAJAH ROHANI BINTI HAJI ABDUL KARIM minta **MENTERI KESIHATAN** menyatakan adakah Kementerian bercadang untuk menurunkan harga ujian RT-PCR untuk memudahkan rakyat mendapatkan keputusan yang lebih tepat ekoran beberapa laporan yang menyatakan keputusan ujian kit antigen kurang tepat.

JAWAPAN

Tuan Yang di-Pertua,

1. Mengambil kira kebajikan rakyat, kadar caj ujian Tindak Balas Berantai Polymerase (RT-PCR) COVID-19 di fasiliti kesihatan kerajaan telah diselaraskan pada harga RM150/ujian bagi warganegara dan RM250/ujian bagi bukan warganegara. Penetapan harga ini buat di bawah Peraturan-Peraturan Pencegahan dan Pengawalan Penyakit Berjangkit (Fi Bagi Ujian Pengesanan COVID-19) 2020, akta Pencegahan dan Kawalan Penyakit Berjangkit 1988 (Akta 342) berkuatkuasa pada 29 Jun 2020.

2. Selari dengan usaha ini, kadar caj ujian RT-PCR COVID-19 di fasiliti swasta telah diturunkan dari sekitar RM 250-350/ujian pada awal pandemik tahun 2020 ke RM150/ujian bagi Semenanjung Malaysia dan RM 200/ujian bagi Sabah/ Sarawak/ Labuan. Penurunan kadar caj ini dilaksanakan melalui penguatkuasaan Ordinan Darurat pada 17 Mei 2021.

3. Semua kit ujian antigen COVID-19 yang diberi kelulusan oleh Pihak Berkuasa Peranti Perubatan (MDA) perlu melepasi penilaian teknikal oleh Jawatankuasa Penilaian Akses Khas Kit Ujian COVID-19 (JPAKC) yang dianggotai pegawai-pegawai berkepakaran dari Institut Penyelidikan Perubatan (IMR) dan Makmal Kesihatan Awam Kebangsaan (MKAK). Setelah melepasi penilaian teknikal oleh JPAKC, kit ujian itu perlu menjalani ujian pengesahan prestasi bagi sensitiviti dan spesifisiti di makmal pengujian yang mempunyai akreditasi ISO 17025 seperti di IMR, MKAK dan beberapa hospital terpilih dan perlu melepasi standard prestasi yang ditetapkan oleh JPAKC, iaitu 100% spesifisiti dan 90% sensitiviti.

4. Untuk memastikan keselamatan dan prestasi kit ujian yang berada dalam pasaran pula, syarikat-syarikat yang terlibat dalam pengimportan dan pengedaran kit ujian dikehendaki melaksanakan sistem pemantauan dan pengawasan pasca-pasaran. Jika terdapat aduan mengenai masalah berkaitan kit ujian mereka, syarikat-syarikat tersebut dikehendaki membuat siasatan ke atas aduan tersebut serta mengambil tindakan pembetulan, yang mana dalam kes-kes tertentu *establishment* perlu membuat panggilan balik (*recall*) kit ujian yang bermasalah dan melaporkannya kepada MDA.

5. MDA telah membangun dan melaksanakan mekanisma kawalan berdasarkan kerangka dan kuasa yang diperuntukkan di bawah Akta Peranti Perubatan 2012 (Akta 737). Ia merangkumi penilaian awal berkaitan keselamatan dan prestasi kit ujian COVID-19 sebelum ia diimport dan diedarkan, meletakkan syarat-syarat tertentu yang perlu dipatuhi oleh *establishment* yang mengimport dan mengedarkan kit ujian ini, dan mengkehendaki mereka melaksanakan aktiviti pemantauan dan pengawasan pasca-pasaran setelah sesuatu kit ujian berada dalam pasaran.

6. Orang ramai yang hendak membuat sebarang aduan berkaitan kit ujian COVID-19 boleh mengemukakannya melalui sistem pengurusan maklumbalas MDA, di <https://femes.mda.gov.my> atau emel, mdb@mda.gov.my

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

DARIPADA : TUAN R. SIVARASA [SUNGAI BULOH]

TARIKH : 11 NOVEMBER 2021 (KHAMIS)

SOALAN

TUAN R. SIVARASA [SUNGAI BULOH] minta **MENTERI SUMBER MANUSIA** menyatakan jumlah pekerja asing setakat 30 September 2021 dan mengikut sektor dan kerakyatan yang bekerja di Malaysia dengan dokumentasi yang sah dan apakah anggaran (estimate) jumlah PATI (pekerja asing tanpa dokumentasi sah) untuk tempoh dan kategori yang sama.

JAWAPAN

Tuan Yang Di Pertua,

Berdasarkan aplikasi MyIMMs di bawah Jabatan Imigresen Malaysia, sehingga **30 September 2021**, terdapat seramai **1.12 juta orang pekerja asing** berdaftar dan dikeluarkan Pas Lawatan Kerja Sementara (PLKS) di Malaysia.

Mereka bekerja dalam **enam (6) sektor formal** dan **satu (1) sektor informal** seperti perincian berikut:

<u>Bil.</u>	<u>Sektor</u>	<u>Bilangan (orang)</u>
1.	Perkilangan	399,894
2.	Pembinaan	239,430
3.	Perladangan	141,022
4.	Perkhidmatan	162,257
5.	Pertanian	87,596
6.	Pembantu Rumah Asing	90,483
7.	Perlombongan & Perkuarian	74

Daripada jumlah tersebut, **lebih 60 peratus** pekerja asing adalah di kalangan warga negara Indonesia dan Bangladesh. Bilangan pekerja asing mengikut negara sumber pula adalah seperti berikut:

<u>Bil.</u>	<u>Negara</u>	<u>Bilangan</u>
1.	Indonesia	368,146
2.	Bangladesh	328,377
3.	Nepal	170,468
4.	Myanmar	107,096
5.	India	56,258
6.	Filipina	37,316
7.	Pakistan	29,966

8.	Vietnam	8,186
9.	Thailand	4,968
10.	China	4,034
11.	Sri Lanka	3,796
12.	Kemboja	1,954
13.	Lao PDR	188
14.	Uzbekistan	2
15.	Kazakhstan	1

Menerusi **Program Rekalibrasi Pulang**, seramai **147,705 orang PATI** telah membuat pendaftaran untuk pulang ke negara asal dan sehingga 30 September 2021, **seramai 124,423 orang (84 peratus)** telah disahkan pulang.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA 2021 PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 11 NOVEMBER 2021 (KHAMIS)

SOALAN

PUAN RUBIAH BINTI HAJI WANG minta **MENTERI PERUMAHAN DAN KERAJAAN TEMPATAN** menyatakan :-

- (a) status pelaksanaan projek perumahan Mesra Rakyat; dan
- (b) bilangan permohonan yang telah diluluskan dan diterima dari negeri Sarawak khususnya di Kota Samarahan untuk tempoh dari tahun 2018 sehingga 2021.

JAWAPAN

Tuan Yang di-Pertua,

Jawapan (a)

Untuk makluman Ahli Yang Berhormat, Kerajaan komited untuk meneruskan **Program Rumah Mesra Rakyat (RMR) di bawah Syarikat Perumahan Negara Berhad (SPNB)** yang juga terbukti memberi manfaat perumahan khusus kepada golongan B40 yang mempunyai tanah sendiri atau tanah milik ahli keluarga yang diberi kebenaran. Setakat ini, sebanyak **47,714 unit telah siap dibina** di seluruh negara. Program ini adalah bagi memenuhi keperluan rakyat berpendapatan rendah (B40) untuk membina rumah di atas tanah sendiri berdasarkan syarat-syarat yang ditetapkan.

Berdasarkan statistik dari tahun 2002 sehingga 30 September 2021, sebanyak **87,893** permohonan telah diterima di seluruh negara di mana sebanyak **54,459 (62%)** permohonan telah diluluskan. Daripada jumlah yang telah diluluskan tersebut, **47,714** unit telah disiapkan, **4,824** unit sedang dibina dan bakinya **1,921** unit dalam peringkat perancangan.

Jawapan (b)

Berdasarkan rekod dari **tahun 2018 hingga 30 September 2021**, sebanyak **834** unit permohonan telah lengkap diterima di seluruh Sarawak di mana sebanyak **398 (48%)** permohonan telah diluluskan. Daripada jumlah yang telah diluluskan tersebut, **318 unit** telah disiapkan, **64** unit sedang dibina dan bakinya **16** unit dalam peringkat perancangan.

Bagi kawasan di parlimen **Kota Samarahan** pula, sebanyak **105** unit permohonan telah lengkap diterima di mana sebanyak **44 (42%)** permohonan telah diluluskan. Daripada jumlah yang telah diluluskan tersebut, **37** unit telah disiapkan, **5** unit sedang dibina dan bakinya **2** unit dalam peringkat perancangan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB PUAN HANNAH YEOH TSEOW SUAN
(SEGAMBUT)**

TARIKH : 11 NOVEMBER 2021 (KHAMIS)

SOALAN

PUAN HANNAH YEOH TSEOW SUAN [SEGAMBUT] minta **MENTERI DALAM NEGERI** menyatakan dengan terperinci berapa jumlah dan peratusan peruntukan yang diberikan kepada Bahagian D11 (Siasatan Seksual, Wanita dan Kanak-Kanak) jika dibandingkan dengan semua bahagian lain di bawah Jabatan Siasatan Jenayah di Bukit Aman.

JAWAPAN

Tuan Yang Di Pertua,

Jabatan Siasatan Jenayah (JSJ), Polis Diraja Malaysia (PDRM), Bukit Aman terdiri daripada 15 bahagian iaitu D1 sehingga D14 (termasuk Bahagian Siasatan Seksual, Wanita dan Kanak-Kanak atau D11) serta Bahagian Urus Setia.

JSJ Bukit Aman telah disediakan peruntukan sebanyak **RM33,431,671** bagi tahun 2021. Daripada jumlah tersebut, sebanyak **RM543,394 (1.63%)** telah diagihkan kepada Bahagian D11 yang merangkumi tuntutan perjalanan, bayaran bil telefon, kontrak sewaan, kontrak penyelenggaraan dan lain-lain.

Dalam usaha menambah baik penyampaian perkhidmatan termasuk mengambil kira kompleksiti kes jenayah eksploitasi seksual terhadap wanita dan kanak-kanak yang menggunakan inovasi teknologi terkini, Kementerian Dalam Negeri (KDN) mencadangkan pemerkasaan Bahagian D11, JSJ PDRM dengan keperluan peruntukan sebanyak **RM17.8 juta dalam Inisiatif Bajet 2022** merangkumi pewujudan 148 perjawatan baharu, perolehan harta modal dan kenderaan serta penyediaan bahan publisiti dan pameran.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 11 NOVEMBER 2021 (KHAMIS)

SOALAN

DATUK HAJI AHMAD JAZLAN BIN YAAKUB minta **MENTERI KESIHATAN** menyatakan adakah Kementerian mempunyai data dan statistik pengambilan vaksin oleh golongan imigran dan pendatang asing yang menetap di Malaysia.

JAWAPAN

Tuan Yang di-Pertua,

1. Sehingga 28 Oktober 2021, seramai 3,066,716 golongan imigran dan pendatang asing yang menetap di Malaysia atau 12.9 peratus dari populasi dewasa di negara ini sudah menerima sekurang-kurangnya satu dos vaksin, manakala 2,466,976 atau 80.4 peratus dari golongan ini sudah menerima suntikan dos lengkap vaksin bagi 1 dos lengkap vaksin bagi Cansino dan 2 dos lengkap vaksin bagi jenis Pfizer dan Sinovac.

2. Golongan imigran dan pendatang asing dari Indonesia adalah merupakan golongan yang tertinggi sudah menerima sekurang-kurangnya satu dos vaksin iaitu seramai 1,131, 993 atau 36.9 peratus daripada jumlah keseluruhan golongan imigran dan pendatang asing yang telah disuntik dos vaksin. Diikuti dengan warga Bangladesh seramai 662,145 atau 21.6 peratus dan warga Filipina seramai 353,904 atau 11.5 peratus yang telah menerima dos suntikan vaksin.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

DARIPADA : TUAN CHAN FOONG HIN [KOTA KINABALU]

TARIKH : 11 NOVEMBER 2021 (KHAMIS)

SOALAN

TUAN CHAN FOONG HIN [KOTA KINABALU] minta **MENTERI SUMBER MANUSIA** menyatakan adakah Kerajaan bercadang menerima desakan Kongres Kesatuan Sekerja Malaysia (MTUC) supaya segera meminda Akta Kerja 1955 dengan memasukkan dalam akta berkenaan pekerja ekonomi gig seperti e-hailing, pengangkutan makanan dan barangan serta perniagaan dalam talian bagi membolehkan kebajikan mereka dilindungi.

JAWAPAN

Tuan Yang Di Pertua,

Akta Kerja 1955 [*Akta 265*] merupakan undang-undang buruh utama yang mengawal hubungan antara majikan dan pekerja melalui penetapan hak-hak pekerja dan standard-standard minimum penggajian yang perlu dipatuhi. Objektif utama Akta 265 adalah untuk memberi perlindungan asas kepada golongan pekerja khususnya yang tidak berkesatuan dan kurang berkeupayaan untuk berunding dengan majikan mereka bagi mendapatkan terma dan syarat pekerjaan yang lebih baik.

Kementerian Sumber Manusia sedang dalam proses pindaan Akta 265 dimana Rang Undang-Undang Kerja (Pindaan) 2021 telah dibentangkan untuk bacaan kali pertama di Dewan Rakyat pada 25 Oktober 2021 dengan memasukkan beberapa cadangan penambahbaikan, antaranya memperluas perlindungan kepada pekerja, memelihara kebajikan pekerja dan keluarga dan menggalakkan *work-life balance*, mewujudkan fleksibiliti dalam menentukan waktu kerja, hari kerja atau tempat kerja mengikut kesesuaian perniagaan dan pekerja serta memperkuat aspek penguatkuasaan.

Berkaitan dengan cadangan Kongres Kesatuan Sekerja Malaysia (MTUC) untuk meliputi pekerja ekonomi gig seperti e-hailing, pengangkutan makanan dan barangan serta perniagaan dalam talian dalam pindaan Akta 265, pekerja ekonomi gig adalah tidak tersenarai di dalam definisi pekerja di bawah Akta 265.

Struktur hubungan antara pekerja gig ekonomi dan penyedia platform dari segi hubungan '*master and servant*' adalah sukar untuk dibuktikan. Kementerian juga tidak mempunyai sebarang rekod atau pemfailan kes buruh berkaitan golongan ini yang boleh digunakan sebagai *test case* atau penandaarasan. Ini kerana *construct* undang-undang perburuhan negara adalah berdasarkan *nature of business* dan konteks hubungan pekerja-majikan yang tradisional. Berikutan ini, pekerja gig adalah tidak tertakluk di bawah Akta Kerja 1955 [*Akta 265*] pada masa ini.

Walau bagaimanapun, Kerajaan amat prihatin terhadap perlindungan dan kebajikan pekerja ekonomi gig yang merupakan antara penyumbang utama kepada ekonomi negara. Buat masa sekarang Kementerian Sumber Manusia melalui Pertubuhan Keselamatan Sosial (PERKESO) menyediakan bentuk perlindungan keselamatan sosial di bawah Akta Keselamatan Sosial Pekerjaan Sendiri 2017 [Akta 789] bagi individu-individu yang bekerja sendiri, termasuklah pekerja gig. Akta 789 ini telah dikuatkuasakan mulai 1 Jun 2017 yang kini meliputi 20 sektor atau perusahaan di Malaysia.

Bagi menjamin anak muda yang terlibat dalam ekonomi gig ini terus terbela, peraturan-peraturan mengenai pekerja yang menjalankan perkhidmatan pengangkutan dan penghantaran barangan atau makanan telah pun dikuatkuasakan mulai 1 Oktober 2021. Penguatkuasaan ini dijangka dapat menarik lebih ramai kumpulan sasar menyertai perlindungan yang disediakan oleh Akta 789.

Inisiatif perlindungan keselamatan sosial pekerjaan sendiri diberikan kepada Orang Bekerja Sendiri (OBS) yang mengalami kemalangan atau kematian semasa menjalankan aktiviti pekerjaannya. Berdasarkan statistik pencarum PERKESO, sehingga 24 September 2021, seramai 13,333 OBS dilindungi di bawah program Penjana Gig, manakala di bawah SPS Lindung pula, seramai 194,800 OBS.

Kementerian Sumber Manusia juga sedang menjalankan sesi libat urus bersama penyedia-penyedia platform gig bagi mendapatkan sebarang maklum balas atau pandangan berhubung cadangan penggubalan rang undang-undang pekerja ekonomi gig supaya tidak menjejaskan keunikan pekerjaan gig itu sendiri.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK SERI PANGLIMA HAJAH AZIZAH BINTI
DATUK SERI PANGLIMA HAJI MOHD DUN
(BEAUFORT)**

TARIKH : 11 NOVEMBER 2021 (KHAMIS)

SOALAN

Minta **MENTERI BELIA DAN SUKAN** menyatakan status Kompleks Sukan Kuala Penyu di Menumbok, Sabah.

JAWAPAN

Tuan Yang Di-Pertua,

Untuk makluman Ahli Yang Berhormat, cadangan pembinaan Kompleks sukan Kuala Penyu di Menumbok ini ditangguh buat sementara berikutan Kementerian ini masih menunggu cadangan tapak atau lokasi yang lebih sesuai. Pihak Yang Berhormat boleh mengemukakan semula permohonan pembinaan Kompleks Sukan Kuala Penyu ini bersama-sama cadangan lokasi dan tanah yang sesuai untuk pertimbangan pihak Kementerian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN BARU BIAN [SELANGAU]

TARIKH : 11 NOVEMBER 2021 (KHAMIS)

SOALAN

TUAN BARU BIAN minta **MENTERI PEMBANGUNAN LUAR BANDAR** menyatakan adakah MARA mempunyai sebarang program untuk membantu pelajar Bumiputera Dayak dari Sarawak. Berapa peratus biasiswa MARA diberikan kepada pelajar Dayak dalam tempoh 10 tahun yang lalu.

JAWAPAN

Tuan Yang di-Pertua,

MARA sentiasa komited dalam menyediakan akses kepada pendidikan yang inklusif dan berkualiti untuk pelajar bumiputera termasuk pelajar bumiputera dayak dari Sarawak. Sistem pendidikan MARA menawarkan peluang pendidikan bermula dari peringkat menengah hingga tertiar khususnya untuk kumpulan isi rumah terendah (B40) selaras dengan matlamatnya bagi membangunkan sosioekonomi masyarakat bumiputera.

Untuk makluman Yang Berhormat, MARA turut menyediakan kemudahan pinjaman pelajaran kepada para pelajar di semua peringkat pengajian. Bagi tempoh 10 tahun yang lepas, MARA telah memberikan pinjaman pelajaran kepada 4,589 pelajar bumiputera Sarawak iaitu 3.47% daripada keseluruhan penerima pinjaman MARA. Manakala bagi tahun 2021, seramai 61 orang atau 3.66% pelajar bumiputera Sarawak telah menerima kemudahan pinjaman pelajaran MARA. Daripada jumlah tersebut, 10 penerima adalah pelajar bumiputera dayak.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 11 NOVEMBER 2021 (KHAMIS)

SOALAN

TUAN AHMAD FADHLI BIN SHAARI minta **MENTERI KESIHATAN** menyatakan perancangan Kerajaan untuk menaik taraf Klinik Kesihatan Tendong, Pasir Mas yang telah mengalami lebihan kapasiti pelanggan semenjak beberapa tahun.

JAWAPAN

Tuan Yang di-Pertua,

1. Klinik Kesihatan Tendong beroperasi dengan purata kedatangan pesakit seramai 385 orang sehari pada tahun 2018 dan bilangannya semakin meningkat kepada 438 orang sehari pada tahun 2019, 356 orang sehari pada tahun 2020 (penurunan kerana pandemik COVID-19) dan 417 orang sehari pada tahun 2021.
2. Berikutan peningkatan pesakit dan keadaan klinik yang usang, projek pembinaan Klinik Kesihatan (Jenis 3) Tendong dengan Kuarters Tendong, Pasir Mas (Gantian) telah diluluskan oleh Unit Perancang Ekonomi, Jabatan Perdana Menteri (UPE, JPM) dalam *Rolling Plan* Empat Rancangan Malaysia Kesebelas (RP4, RMKe-11) pada tahun 2020. Projek ini dijadualkan untuk ditender pada bulan Februari 2022 dan dimulakan pembinaannya pada penghujung suku pertama tahun 2022.
3. Antara skop projek klinik kesihatan ini adalah komponen *Infectious Disease (ID)*, *sistem Teleprimary Care-Oral Health Clinical Information System (TPC-OHCIS)*, sistem keselamatan kamera litar tertutup (CCTV), pembinaan empat (4) unit kuarters jenis F dan G bagi menggantikan kuarters sedia ada serta pembelian peralatan perubatan (seperti peralatan x-ray dan kerusi roda) dan bukan perubatan (seperti kerusi dan meja).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN OSCAR LING CHAI YEW [SIBU]

TARIKH : 11 NOVEMBER 2021 (KHAMIS)

SOALAN

TUAN OSCAR LING CHAI YEW minta **MENTERI KESIHATAN** menyatakan bagaimana mengatasi masalah kekurangan kakitangan perubatan dan alat-alat perubatan di Hospital Sibu. Nyatakan jumlah dana yang disalurkan ke Hospital Sibu pada tahun 2020 dan 2021 untuk mengatasi wabak COVID- 19.

JAWAPAN

Tuan Yang di-Pertua,

1. Hospital Sibu merupakan sebuah Hospital Pakar Major. Pada masa ini, terdapat seramai 1,853 anggota lantikan tetap yang berkhidmat di hospital berkenaan iaitu pengisian sebanyak 94.5% berbanding 1,961 perjawatan yang diluluskan. Hospital ini juga turut menempatkan seramai 426 anggota lantikan kontrak menjadikan jumlah keseluruhan anggota yang berkhidmat di Hospital Sibu seramai 2,279 orang. Daripada jumlah tersebut seramai 268 merupakan Pegawai Perubatan termasuk Pakar Perubatan lantikan tetap. Selain itu, terdapat seramai 279 Pegawai Perubatan lantikan kontrak serta 714 Jururawat lantikan tetap dan 51 lantikan kontrak.

2. KKM sentiasa menitikberatkan penyampaian perkhidmatan bagi keperluan penduduk Sibu dimana KKM melaksanakan lawatan Pakar dari pelbagai bidang kepakaran. Pada masa ini sebanyak 27 subkepakaran

yang disediakan di Hospital Sibu melalui lawatan Pakar dari pelbagai hospital di negeri Sarawak dan juga Hospital Kuala Lumpur.

3. Semasa pandemik COVID-19, Hospital Sibu juga telah menyumberluar perkhidmatan perubatan ke hospital swasta yang mana sebanyak RM2.47 juta telah dibelanjakan bagi tujuan ini melibatkan 886 rawatan atau prosedur pembedahan dan bukan pembedahan.

4. Bagi memperkukuhkan peralatan perubatan di Hospital Sibu, KKM telah memperuntukan sejumlah RM12,140,762 kepada Hospital Sibu bagi perolehan peralatan perubatan sepanjang tempoh 2020 sehingga Oktober 2021 mengikut keutamaan pihak hospital dan Jabatan Kesihatan Negeri Sarawak. Peralatan ini termasuklah peralatan perubatan yang diperlukan dalam menangani wabak COVID-19 di Hospital Sibu. Antara peralatan yang telah diperolehi bagi adalah ventilator, *High Flow Nasal Cannula (HFNC)*, mesin Hemodialisis, Mesin *Continuous Renal Replacement Therapy (CRRT)*, *Ultrasound*, *Incubator* dan lain-lain lagi.

5. Selain itu KKM juga telah melaksanakan kerja naik taraf Hospital Sibu bagi pengurusan COVID-19 termasuk pembinaan ICU modular dan hospital medan yang dengan perbelanjaan sebanyak RM 4,568,685.00.

6. Di bawah RP1, RMK-12 pula, KKM telah memperuntukkan sebanyak RM24,295,267.00 di bawah peruntukan pembangunan untuk Hospital Sibu.

7. KKM akan sentiasa memantau keperluan dalam penambahan atau penggantian peralatan dan juga menaik taraf hospital ini dari masa ke semasa agar perkhidmatan kesihatan di hospital ini tidak akan terjejas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 11 NOVEMBER 2021 (KHAMIS)

SOALAN

PUAN NURUL IZZAH BINTI ANWAR minta **MENTERI KESIHATAN** menyatakan :

- (a) senarai dan butiran terperinci kajian perubatan yang sedang dijalankan Kementerian terhadap penggunaan ketum dan marijuana; dan
- (b) kelulusan spektrum ubat-ubatan untuk memenuhi keperluan pelaksanaan dasar pengurangan kemudaratan (*harm reduction*) di bawah Kementerian.

JAWAPAN

Tuan Yang di-Pertua,

1. Buat masa ini, tiada kajian yang sedang dijalankan oleh pihak Kementerian Kesihatan Malaysia (KKM) ke atas penggunaan ketum. Walau bagaimanapun, beberapa kajian pra klinikal ke atas ekstrak daun ketum pernah dijalankan oleh pihak Institut Penyelidikan Perubatan (IMR) sebelum ini seperti berikut:

- (a) Kajian mengenalpastian kandungan bahan kimia bagi penyediaan ekstrak terpiawai (*standardized extract*) dengan mitragynine (kompaun unik di dalam ketum) sebagai penanda aras;
- (b) Kajian keselamatan yang meliputi kajian *acute toxicity* (kajian keselamatan akut dengan satu dos yang tinggi), *cytotoxicity* (kajian toksisiti ke atas sel) dan *mutagenicity* (kajian keselamatan bagi menentukan sama ada ekstrak boleh menyebabkan perubahan mutlak material genetik di dalam sel). Kajian-kajian ini menunjukkan bahawa ekstrak daun ketum adalah selamat bagi penggunaan dalam jangka masa pendek; dan
- (c) Kajian keberkesanan mendapati ekstrak ketum mempunyai kesan sebagai antimalaria (membunuh parasit malaria) dan antimutagenik (mencegah sel dari mengalami perubahan material genetik yang boleh menjadi punca penyakit kanser).

2. Sebuah monograf bahan mentah bagi pengecaman daun ketum telah disediakan oleh pihak Jawatankuasa Monograf Herba Malaysia dan boleh di akses di laman web *Global Information Hub on Integrated Medicine* (GlobinMed) dengan capaian berikut: https://www.globinmed.com/medicinal_herbs/mitragyna-speciosa-korth-havil-105563/.

3. Selain itu, beberapa kajian pra klinikal ke atas mitragynine dan

ekstrak ketum yang turut meliputi kajian keberkesanannya pernah dijalankan oleh agensi lain seperti Institut Penyelidikan Perhutanan Malaysia (FRIM) dan juga pihak Institut Pengajian Tinggi Awam (IPTA) seperti Universiti Sains Malaysia (USM), Universiti Putra Malaysia (UPM) dan lain-lain.

4. Data pra klinikal sedia ada masih belum mencukupi bagi membolehkan formulasi ekstrak ketum memasuki fasa kajian klinikal. Beberapa kajian keselamatan bagi penggunaan jangka masa panjang perlu dilakukan. Masalah utama yang dihadapi adalah mendapatkan bahan mentah yang tetap daripada pihak pembekal. Kajian ke atas ketum memerlukan bahan mentah yang mencukupi daripada sumber yang stabil bagi menghasilkan ekstrak terpiawai yang mempunyai kandungan yang serupa bagi kesemua kajian pra klinikal. Kesenambungan penghasilan ekstrak terpiawai daripada bahan mentah ketum yang bersesuaian bagi kajian pra klinikal dan klinikal adalah penting bagi menghasilkan produk ketum yang bernilai tinggi.

5. Bagi marijuana pula, tiada kajian makmal yang sedang atau pernah dijalankan oleh pihak KKM. Satu kajian *scoping review* ke atas hemp pernah dijalankan oleh pihak IMR dan satu jurnal telah diterbitkan iaitu "*Cannabis sativa subsp. sativa's pharmacological properties and health effects: A scoping review of current evidence*".

Tuan Yang di-Pertua,

6. Berhubung kelulusan spektrum ubat-ubatan untuk memenuhi keperluan pelaksanaan dasar pengurangan kemudaratatan (*harm reduction*) di bawah Kementerian, ubat yang telah diluluskan bagi program pengurangan kemudaratatan khususnya rawatan penagihan opiate ialah methadone.

7. Penggunaan methadone adalah merupakan *Medically Assisted Therapy* (MAT) khusus untuk mereka yang mengalami *kebergantungan* kepada opiat. Seperti mana rawatan penyakit kronik yang lain seperti diabetes, hipertensi, rawatan methadone merupakan rawatan sepanjang hayat.

8. Terdapat enam (6) produk yang mengandung metadone yang terdaftar *dengan* Pihak Berkuasa Kawalan Dadah (PBKD) iaitu:

- i) Aseptone Syrup 5mg/ml;
- ii) Alphadone Syrup 5mg/ml;
- iii) Alphadone Syrup 10mg/ml;
- iv) SW Methadon Syrup 5mg/ml;
- v) Bennaston Syrup 5mg/ml; dan
- vi) Adezure Syrup 5mg/ml

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KESAVAN A/L SUBRAMANIAM
(SUNGAI SIPUT)**

TARIKH : 11 NOVEMBER 2021 (KHAMIS)

SOALAN

YB TUAN KESAVAN A/L SUBRAMANIAM minta **MENTERI PERPADUAN NEGARA** menyatakan langkah-langkah yang telah diambil oleh Unit Transformasi Masyarakat India Malaysia (MITRA) bangunkan semula Pelan Tindakan Masyarakat India yang telah dilancarkan pada tahun 2017.

JAWAPAN

Yang Di-Pertua,

1. Unit Khas Untuk Pembangunan Sosioekonomi Komuniti India (SEDIC), Jabatan Perdana Menteri (JPM) telah melancarkan ***Malaysian Indian Blueprint (MIB)*** pada Tahun 2017 yang bertujuan untuk membantu masyarakat India **menangani tiga (3) cabaran utama iaitu:**

- a) **Ekonomi;**
- b) **Pendidikan; dan**
- c) **sosial.**

2. Pada Tahun 2018, SEDIC telah dijenamakan semula sebagai Unit Transformasi Masyarakat India Malaysia (MITRA) dan seterusnya diletakkan di bawah Kementerian Perpaduan Negara bermula pada Mac 2020.

3. Kementerian Perpaduan Negara dan MITRA sedang memuktamadkan **Pelan Pembangunan Masyarakat India (PTMI)** sebagai **panduan pelaksanaan program pembangunan sosioekonomi masyarakat India di bawah tanggungjawab MITRA.**

4. PTMI dibangunkan berteraskan **lima (5) Tunjang** utama iaitu:

- a) **Memperkasakan Keperluan Asas** - membasmi kemiskinan, perumahan dan kestabilan keluarga.
- b) **Meningkatkan Kemenjadian Setiap Kanak-Kanak** - pendidikan awal kanak-kanak, pendidikan rendah SJKT, Sekolah Kebangsaan, pendidikan menengah, pendidikan tinggi dan golongan belia.
- c) **Menaiktaraf Ekonomi & Keusahawanan** - kemahiran professional, keusahawan dan peningkatan kekayaan.

- d) **Memperkasakan Keterangan Sosial** - dokumentasi & kewarganegaraan, isu keagamaan & kuil, sumbangan sosial kuil, dewan orang ramai, kakitangan awam, bebas jenayah dan memperbaiki persepsi; dan
- e) **Memperkasakan Wanita Ke Arah Kesaksamaan Gender** - meningkatkan akses, penyaluran maklumat, kesejahteraan wanita dan wanita terpinggir.

5. **Empat (4) modul utama PTMI** adalah:

- a) Modul Pelaksanaan;
- b) modul Pemantauan;
- c) modul Penilaian; dan
- d) modul Promosi.

6. **Bagi memastikan PTMI dapat dilaksanakan dengan tersusun dan mencapai objektifnya, dua (2) buah jawatankuasa** akan ditubuhkan iaitu:

- a) **Jawatankuasa Pemandu PTMI yang dipengerusikan oleh KSU Kementerian Perpaduan Negara; dan**
- b) **Jawatankuasa Kerja PTMI yang dipengerusikan oleh Ketua Pengarah MITRA.**

7. Usaha pembangunan sosioekonomi masyarakat India B40 oleh MITRA akan dilaksanakan secara bersepadu dan tersusun berdasarkan strategi yang digariskan di bawah PTMI.

8. Usaha ini akan digerakkan oleh Jawatankuasa Kerja PTMI di peringkat MITRA dan dipantau oleh Jawatankuasa Pemandu PTMI di peringkat Kementerian.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : PUAN NOR AZRINA BINTI SURIP (MERBOK)

TARIKH : 11 NOVEMBER 2021 (KHAMIS)

SOALAN

PUAN NOR AZRINA BINTI SURIP minta **MENTERI PERUMAHAN DAN KERAJAAN TEMPATAN** menyatakan berapa tapak pelupusan sisa pepejal mengikut kategori di seluruh Malaysia. Bagaimana dengan jawapan Menteri sebelum ini yang menyatakan akan membina ‘incinerator’ di seluruh negeri dalam masa 2 tahun.

JAWAPAN

Tuan Yang di-Pertua,

Untuk makluman Ahli Yang Berhormat, jumlah tapak pelupusan sisa pepejal yang beroperasi di seluruh Malaysia adalah sebanyak 137 yang terdiri daripada 21 tapak pelupusan sisa pepejal sanitari dan 116 tapak pelupusan sisa pepejal tidak sanitari.

Selain daripada pembinaan tapak pelupusan sisa pepejal sanitari, Kementerian ini juga merancang untuk membina loji rawatan sisa pepejal *waste to energy* (WtE) di negeri Johor, Melaka, Negeri Sembilan, Kedah, Pahang dan Wilayah Persekutuan Kuala Lumpur bagi mengatasi isu kekurangan tapak yang bersesuaian untuk pembinaan tapak pelupusan sanitari serta menampung penjaan sisa yang semakin meningkat sepanjang tahun. Projek WtE ini tidak terhad kepada teknologi insinerator sahaja. Projek WtE boleh menggunakan teknologi-teknologi lain seperti

Anaerobic Digester (AD), pirolisis, gasifikasi dan sebagainya. Pada masa ini, hanya satu projek loji WtE sedang dalam pembinaan iaitu di Ladang Tanah Merah, Port Dickson, Negeri Sembilan yang dijangka akan mula beroperasi pada awal tahun 2022.

Untuk makluman Ahli Yang Berhormat, projek loji WtE Taman Beringin, Kepong, Kuala Lumpur telah ditender pada 29 September 2015 namun ditangguhkan pelaksanaannya kerana terdapat bantahan orang awam. Dalam hal ini, Kementerian ini bersama Unit Kerjasama Awam Swasta dan syarikat yang dilantik sedang berunding mengenai terma-terma perjanjian yang bersesuaian kerana lokasi projek telah berpindah ke Rawang Land 3, Selangor selaras dengan persetujuan Jemaah Menteri pada 17 Jun 2020.

Selain itu, projek loji WtE di Bukit Payong, Batu Pahat, Johor dan Sungai Udang, Melaka masing-masing telah ditender oleh Kementerian ini pada 27 Julai 2020 dan 29 Januari 2021 yang kini berada di peringkat penilaian tender. Kementerian ini menjangkakan pembinaan projek loji WtE Bukit Payong, Batu Pahat, Johor akan dimulakan pada bulan Mei 2023 dan projek loji WtE Sungai Udang, Melaka pada bulan Ogos 2023.

Terdapat 3 lagi loji WtE yang masih dalam peringkat perancangan Kementerian ini iaitu:

- i. WtE Sungai Petani, Kedah;
- ii. WtE Kuantan, Pahang; dan
- iii. WtE Kulai, Johor.

Tender bagi ketiga-tiga projek WtE di atas belum dapat dimulakan kerana pemilihan lokasi dan pemilikan tapak oleh Kerajaan Persekutuan perlu dimuktamadkan terlebih dahulu bersama Kerajaan Negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 11 NOVEMBER 2021 (KHAMIS)

SOALAN

DATO' JOHARI BIN ABDUL [SUNGAI PETANI] minta **MENTERI SUMBER MANUSIA** menyatakan apakah usaha-usaha untuk reskill pekerja-pekerja yang diberhentikan dari sektor peruncitan (*retail*) akibat pandemik COVID-19. Nyatakan berapa anggaran mereka yang terlibat dalam program ini

JAWAPAN

Tuan Yang Di Pertua,

Kementerian Sumber Manusia (KSM) menerusi Pembangunan Sumber Manusia Berhad (PSMB) telah melancarkan Inisiatif PENJANA HRDF dengan objektif untuk menyokong agenda Kerajaan di dalam memulihkan semula ekonomi Negara yang terkesan disebabkan oleh COVID-19. Lima (5) skim telah diperkenalkan melalui inisiatif ini meliputi semua sektor termasuk sektor peruncitan yang terdiri daripada Place & Train, B40 Development, SME Development, Industrial Revolution 4.0 dan Gerak Insan Gemilang (GIG). Skim-skim ini diwujudkan dengan tujuan untuk membantu rakyat dalam mendapat penempatan pekerjaan, pekerjaan sendiri (*self-employed*) serta menambah dan meningkatkan kemahiran mereka.

Setakat 25 Oktober 2021, PSMB telah meluluskan sebanyak 85,527 pelatih bagi mengikuti skim-skim yang melibatkan penempatan pekerjaan dan pekerjaan sendiri ini.

Selain itu, PSMB juga memiliki HRD Corp Placement Centre (HPC) yang berperanan sebagai platform untuk memadankan pekerja dengan peluang pekerjaan yang tersedia oleh majikan berkaitan Peruncitan, Perkhidmatan, Pembuatan dan lain-lain industri lagi. Setakat Oktober 2021, sebanyak 36,997 peluang pekerjaan tersedia melalui HPC dan lebih 4,000 pekerja berjaya ditempatkan melalui inisiatif ini sejak pelancarannya pada April 2021

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN
TUN DR. MAHATHIR [JERLUN]**

TARIKH : 11 NOVEMBER 2021 (KHAMIS)

SOALAN

DATO' SERI UTAMA HAJI MUKHRIZ BIN TUN DR. MAHATHIR minta **MENTERI KESIHATAN** menyatakan apakah Kerajaan bersedia untuk menghadapi gelombang kes COVID-19 lebih besar jika berlakunya pilihan raya:-

- (a) adakah kadar vaksinasi dan peratusan rakyat yang telah divaksin memadai bagi mengelak lebih banyak jangkitan berlaku; dan
- (b) apakah kementerian akan mengambil kira kedudukan semasa pusat kuarantin, petugas-petugas barisan hadapan yang perlu berdepan dengan perkara ini.

JAWAPAN

Tuan Yang di-Pertua,

1. Status liputan vaksin di Malaysia sehingga 10 November 2021 adalah seperti berikut:

- (a) seramai **22,838,338** (97.5%) penduduk dewasa di Malaysia berumur 18 tahun ke atas telah diberikan vaksin sekurang-kurangnya satu dos manakala **22,248,737** (95%) telah diberikan vaksin dos lengkap.
- (b) seramai **2,725,876** (86.6%) penduduk remaja berumur 12 hingga 17 tahun telah diberikan vaksin sekurang-kurangnya satu dos manakala **2,442,373** (77.6%) telah diberikan vaksin dos lengkap.
- (c) Ini menjadikan keseluruhan seramai **25,564,214** (78.3%) penduduk negara telah diberikan vaksin sekurang-kurangnya satu dos manakala **24,691,110** (75.3%) telah diberikan vaksin dos lengkap.

2. KKM telah melaksanakan pemberian suntikan dos penggalak dan dos tambahan kepada populasi yang layak bermula pada 13 Oktober. Sehingga 10 November 2021, seramai **731,635** orang penduduk dewasa telah menerima vaksin ini. Dos penggalak ini diberikan kepada individu berumur 18 tahun dan ke atas yang telah menerima vaksin COVID-19 dos lengkap dengan memberi keutamaan kepada anggota barisan hadapan, individu yang ada ko-morbiditi dan warga emas.

3. Walaupun kadar liputan imunisasi yang lengkap telah melebihi 95% bagi penduduk dewasa, faktor-faktor lain juga perlu diambil kira bagi membolehkan Pilihanraya Negeri (PRN) atau Pilihanraya Umum (PRU) diadakan. Ianya bagi mengelakkan penularan jangkitan COVID-19 yang tidak terkawal dan menyebabkan kadar insiden penyakit COVID-19 dan kadar kematian meningkat semula. Faktor-faktor tersebut termasuklah:

- (a) pelaksanaan SOP pilihan raya yang diperketatkan;
 - (b) perkumpulan ramai sebelum, semasa dan selepas pilihan raya berlangsung berkaitan PRN tidak dibenarkan;
 - (c) memperkukuhkan amalan norma baharu oleh masyarakat Malaysia;
 - (d) pemantauan dan penguatkuasaan SOP agar penularan jangkitan dapat dikekang;
 - (e) menghalang individu yang disyaki dijangkiti COVID-19, sama ada kontak rapat mahupun individu bergejala daripada hadir di mana-mana tempat berkaitan pilihan raya; dan
 - (f) meningkatkan keprihatinan orang ramai untuk menjalankan ujian sendiri RTK Ag bagi mengenal pasti status jangkitan COVID-19 agar tidak mendedahkan orang lain kepada risiko jangkitan. Pelaksanaan langkah-langkah di atas memerlukan kerjasama dan komitmen dari semua pihak termasuk kementerian dan agensi.
4. Selain itu, KKM juga sentiasa bersiap siaga bagi menghadapi kemungkinan peningkatan semula kes COVID-19. Antara perkara yang diambil kira adalah:
- (a) menyediakan fasiliti perkhidmatan penjagaan dan perawatan COVID-19 seperti bersedia menukar fungsi hospital kepada hospital COVID sepenuhnya atau sebagai *hybrid*, menaik taraf hospital yang dikenal pasti daripada segi bilangan katil ICU dan set penuh *ventilator*, kaunter triage, bekalan oksigen, ketersediaan PPE, *stockpiling*, dan sebagainya;
 - (b) kesiapsiagaan bantuan sokongan fasiliti dan perkhidmatan termasuk PKRC, fasiliti kesihatan selain KKM, makmal swasta dan universiti, peruntukan;

SOALAN NO : 27

- (c) bersedia dengan pelan pengurusan sumber manusia kesihatan seperti meningkatkan pengambilan anggota kesihatan, kolaborasi dengan hospital universiti dan swasta, pengurusan kesihatan mental anggota kesihatan;
- (d) memastikan kelestarian rawatan dengan memberi rawatan yang berkesan serta anggota kesihatan yang kompeten;
- (e) pemantapan sistem pengurusan kes pra-hospital dan kecemasan termasuk pemantapan sistem pengangkutan dan pemindahan pesakit ke hospital, pengesanan kes COVID-19 dan kontakannya, pemantauan kes yang menjalani isolasi di rumah dan sebagainya;
- (f) pencegahan jangkitan nosokomial COVID-19 dalam kalangan pesakit, anggota kesihatan serta meningkatkan liputan vaksinasi dalam kalangan staf; dan
- (g) meningkatkan koordinasi dan komunikasi strategik di pelbagai peringkat di KKM dan agensi lain.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN M. KULASEGARAN [IPOH BARAT]

TARIKH : 11 NOVEMBER 2021 (KHAMIS)

SOALAN

TUAN M. KULASEGARAN minta **MENTERI PERPADUAN NEGARA** menyatakan:

- a. secara terperinci mengenai jumlah peruntukan yang diterima dan dibelanjakan oleh MITRA untuk setiap tahun sejak tahun 2018; dan
- b. senaraikan semua penerima dan sejak tahun 2018 dan mengemukakan penyata kewangan MITRA secara telus.

JAWAPAN

Yang Di-Pertua,

Untuk makluman, pihak Suruhanjaya Pencegahan Rasuah Malaysia (SPRM) telah memulakan siasatan ke atas program-program yang telah diluluskan di bawah MITRA bagi tahun 2019 hingga April 2020 (iaitu ketika MITRA di bawah Jabatan Perdana Menteri) hingga tahun 2021 (iaitu Ketika MITRA di bawah Kementerian Perpaduan Negara).

Sehubungan dengan itu, saya tidak akan menjawab soalan Ipoh Barat ini kerana dikhuatiri sebarang pendedahan maklumat yang terperinci mengenai Projek ini akan mengganggu siasatan yang sedang dilaksanakan oleh pihak SPRM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD. NASIR
[JOHOR BAHRU]**

TARIKH : 11 NOVEMBER 2021 (KHAMIS)

SOALAN

TUAN AKMAL NASRULLAH BIN MOHD. NASIR minta **MENTERI KESIHATAN** menyatakan jumlah permohonan serta jumlah dana bantuan kewangan khas yang telah dibelanjakan dan diberikan kepada mereka yang mendapat kesan sampingan yang serius selepas pengambilan vaksin COVID-19.

JAWAPAN

Tuan Yang di-Pertua,

1. Individu yang menerima vaksin COVID-19 di bawah Program Imunisasi COVID-19 Kebangsaan (PICK) dan mendapat kesan sampingan yang serius selepas menerima vaksin COVID-19 layak memohon Bantuan Khas Kewangan Kesan Mudarat Vaksin COVID-19 oleh Kerajaan.
2. Bantuan Khas Kewangan Kesan Mudarat Vaksin COVID-19 ini akan dipertimbangkan berdasarkan kriteria yang perlu dipenuhi iaitu *Adverse Events Following Immunisation* (AEFI) yang berlaku dalam tempoh tiga (3) bulan daripada menerima vaksin mesti dikategorikan sebagai serius berdasarkan laporan penilaian oleh Jawatankuasa Farmakovigilans Khas Vaksin COVID-19 (JFK) dan laporan AEFI hendaklah dihantar kepada Bahagian Regulatori Farmasi Negara (NPRA) oleh anggota kesihatan yang merawat pesakit.

3. Amaun Bantuan Khas Kewangan Kesan Mudarat Vaksin COVID-19 yang telah ditetapkan adalah tidak melebihi RM50,000 jika berlaku kesan advers yang serius kepada penerima vaksin COVID-19 yang memerlukan rawatan berpanjangan di hospital dan tidak melebihi RM500,000 jika berlaku hilang upaya kekal atau kematian disebabkan vaksin COVID-19. Amaun bantuan sebenar kepada individu yang terkesan oleh AEFI akan ditentukan berdasarkan perakuan oleh Jawatankuasa Teknikal Perubatan (JTP) dan diputuskan oleh Jawatankuasa Induk Bantuan Khas Kewangan Kesan Mudarat Vaksin COVID-19.
4. Hingga 5 November 2021, sebanyak tujuh puluh tujuh (77) permohonan bantuan khas kewangan kesan mudarat vaksin COVID-19 telah diterima oleh Kementerian Kesihatan.
5. Daripada jumlah tersebut, sebanyak lapan (8) permohonan telah diluluskan oleh Jawatankuasa Induk dan dalam proses pembayaran melibatkan jumlah sebanyak RM132,500.
6. Sebanyak enam puluh dua (62) permohonan masih dalam penilaian manakala tujuh (7) permohonan telah ditolak.
7. Daripada enam puluh dua (62) permohonan tersebut, enam puluh satu (61) permohonan dalam penilaian JFK manakala satu (1) permohonan dalam penilaian semula JTP.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN MUHAMMAD BAKHTIAR BIN WAN
CHIK (BALIK PULAU)**

TARIKH : 11 NOVEMBER 2021 (KHAMIS)

SOALAN

TUAN MUHAMMAD BAKHTIAR BIN WAN CHIK [BALIK PULAU] minta
MENTERI DALAM NEGERI menyatakan :-

(a) bilangan terkini peserta Program Malaysia Rumah Keduaku (MM2H)
setelah diperkenalkan syarat baharu; dan

(b) berapa anggaran kerugian sebaik sahaja syarat kelayakan program
MM2H diperkenalkan.

JAWAPAN

Tuan Yang Di Pertua,

Untuk makluman Ahli Yang Berhormat, Program Malaysia Rumah Keduaku (MM2H) akan diaktifkan semula dijangka mulai Oktober 2021 setelah semua proses berkaitan perundangan selesai. Justeru, Kementerian Dalam Negeri belum mempunyai rekod atau statistik terkini peserta Program MM2H setelah diperkenalkan syarat baharu yang dapat diberikan buat masa ini.

Program MM2H adalah disasarkan kepada golongan pesara dan berpendapatan tinggi yang berhasrat untuk tinggal di Malaysia bagi tempoh masa yang panjang dan hendak berbelanja di Malaysia. Sehubungan itu, Kerajaan yakin tidak akan timbul isu kehilangan pendapatan atau kerugian yang disebabkan dengan penambahbaikan syarat-syarat penyertaan Program MM2H. Sebaliknya, Kerajaan melihat ke hadapan dan optimistik dengan inisiatif penambahbaikan syarat-syarat kelayakan akan menjana kesan berganda yang positif kepada ekonomi negara terutamanya kepada sektor hartanah, pendidikan, kesihatan, pelancongan perubatan melalui perbelanjaan domestik oleh peserta MM2H yang berkualiti tinggi dan *genuine*.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : TUAN M. KULASEGARAN
[IPOH BARAT]**

TARIKH : 11 NOVEMBER 2021 (KHAMIS)

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan langkah drastik yang akan diambil oleh Kerajaan untuk meningkatkan peluang bagi pelajar India untuk melanjutkan pengajian ke latihan kemahiran TVET di mana laporan menunjukkan bahawa kurang daripada 1% pelajar India yang diterima masuk oleh Pusat TVET setakat ini.

JAWAPAN

Tuan Yang Di Pertua,

Kursus-kursus yang ditawarkan di ILJTM adalah terbuka kepada semua peringkat masyarakat yang meliputi golongan belia lepasan Sijil Pelajaran Malaysia (SPM) sehingga kepada golongan pekerja industri. Peluang bagi menjalani latihan di ILJTM adalah terbuka tanpa mengira kaum.

Terdapat 32 buah Institut Latihan Jabatan Tenaga Manusia (ILJTM) di bawah Kementerian Sumber manusia, terdiri daripada 23 buah Institut latihan Perindustrian (ILP), 8 buah Pusat Latihan Teknologi Tinggi (ADTEC), dan sebuah Japan-Malaysia Technical Institute (JMTI) di seluruh negara. Ianya terbuka kepada semua golongan belia daripada lepasan SPM dan pekerja untuk menyertai latihan kemahiran atau meningkatkan kemahiran bagi mengikuti kursus sepenuh masa atau separuh masa.

Pelbagai aktiviti promosi diadakan untuk menggalakkan rakyat menyertai latihan kemahiran atau meningkatkan kemahiran dengan menganjurkan pameran, memenuhi undangan ceramah kerjaya di sekolah-sekolah dan penganjuran pelbagai aktiviti yang melibatkan komuniti setempat.

Selain itu, ILJTM turut melibatkan diri dalam pelbagai karnival di peringkat Kebangsaan yang dianjurkan oleh pelbagai Kementerian yang berkaitan Latihan Kemahiran seperti 'Karnival Jom Masuk U' anjuran Kementerian Pendidikan dan Karnival & Ekspo Kemahiran Kebangsaan (KEKK) anjuran Jabatan Pembangunan Kemahiran dan lain-lain lagi.

JTM melalui Unit Promosi di setiap ILJTM di seluruh negara menganjurkan program promosi atau *outreach* kepada belia-belia Malaysia terutama anak-anak muda kawasan kampung bertujuan untuk

SOALAN NO: 31

memberi pendedahan kepada golongan sasaran mengenai program pembelajaran sepanjang hayat, dan memberi kesedaran kepada mereka mengenai peluang-peluang menyertai latihan kemahiran yang disediakan oleh JTM. Setiap tahun JTM membuat pengiklanan kemasukan ke ILJTM pada bulan Mac dan September di media elektronik utama, sementara aktiviti-aktiviti susulan dan promosi secara berterusan kepada rakyat dan kumpulan sasaran dilaksanakan oleh setiap ILJTM.

Hasil promosi yang intensif telah dilaksanakan pada hujung tahun 2019 melalui *Talk Show* ke daerah-daerah yang ramai penduduk India yang berhampiran dengan ILJTM seperti ILP Kuala Langat, ILP Kuala Lumpur, ILP Arumugam Pilai Nibong Tebal, ILP Kuantan dan ADTEC Melaka dengan NGO India melalui **Program Belia India** dan juga promosi melalui siaran radio berbahasa Tamil, JTM telah menerima permohonan yang begitu menggalakkan daripada belia India lepasan sekolah untuk mengikuti latihan. Daripada statistik data pendaftaran pelajar di dapati ada trend peningkatan bilangan pelajar India bagi kursus sepenuh masa yang memasuki ILJTM seperti jadual dibawah:

Tahun	Bil. Pelajar keseluruhan	Bil. Pelajar India	% Pelajar India
1/2019	2975	195	7%
2/2019	5464	324	6%
1/2020	3347	320	10%
2/2020	4031	253	6%
1/2021	Tiada pengambilan akibat pandemik covid-19		
2/2021	4408	355	6%

SOALAN NO: 31

Selain itu, JTM turut melaksanakan kursus jangka pendek yang berkonsepkan modular atau *customized*, dan ianya adalah terbuka kepada mereka yang berhasrat untuk meningkatkan kemahiran sedia ada ataupun mempelajari kemahiran-kemahiran baru sebagai persiapan memasuki pasaran pekerjaan. Daripada data peserta India yang mengikuti kursus jangka pendek yang berdaftar dengan ILJTM pula adalah seperti berikut:

Tahun	Bil. Pelajar keseluruhan	Bil. Pelajar India	% Pelajar India
2018	51,455	2,315	4.5%
2019	55,182	2,893	5.2%
2020	28,316	1,247	4.4%
2021 (hingga Ogos)	15,597	825	5.3%

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN SIVAKUMAR VARATHARAJU
NAIDU [BATU GAJAH]**

TARIKH : 11 NOVEMBER 2021 (KHAMIS)

SOALAN

YB TUAN SIVAKUMAR VARATHARAJU NAIDU minta **MENTERI PERPADUAN NEGARA** menyatakan secara terperinci mengenai Projek Lembu Tenusu MITRA yang telah dilancarkan pada tahun ini. Senaraikan nama peserta-peserta yang terlibat mengikut negeri dan syarikat mana yang dipertanggungjawabkan untuk membeli lembu tenusu kacukan Fresian bunting dari Australia dan bagaimanakan cara pengagihan kepada peserta dilakukan.

JAWAPAN

Yang Di-Pertua,

Untuk makluman, pihak Suruhanjaya Pencegahan Rasuah Malaysia (SPRM) telah memulakan siasatan ke atas program-program yang telah diluluskan di bawah MITRA bagi tahun 2019 hingga April 2020 (iaitu ketika MITRA di bawah Jabatan Perdana Menteri) hingga tahun 2021 (iaitu Ketika MITRA di bawah Kementerian Perpaduan Negara). Projek Ternakan Lembu Tenusu juga termasuk dalam program yang sedang disiasat.

Sehubungan dengan itu, saya tidak akan menjawab soalan Batu Gajah ini kerana dikhuatiri sebarang pendedahan maklumat yang terperinci mengenai Projek ini akan mengganggu siasatan yang sedang dilaksanakan oleh pihak SPRM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 11 NOVEMBER 2021 (KHAMIS)

SOALAN

PUAN NURUL IZZAH BINTI ANWAR [PERMATANG PAUH] minta **MENTERI SUMBER MANUSIA** menyatakan sama ada pencari kerja akan dilindungi daripada sebarang bentuk diskriminasi (dari segi jantina, bangsa, agama ataupun status keupayaan), mengambil kira pendirian SUHAKAM dan Majlis Peguam bahawa tiadanya halangan undang-undang bagi Kerajaan memasukkan terma pencari kerja dalam Akta Pekerjaan.

JAWAPAN

Tuan Yang Di Pertua,

Rang Undang-Undang Kerja (Pindaan) 2021 telah dibentangkan untuk bacaan kali pertama di Parlimen pada 25 Oktober 2021. Bacaan kedua dijadualkan untuk dibentangkan mulai 14 hingga 16 Disember 2021.

Cadangan pindaan RUU Kerja ini melibatkan beberapa peruntukan baharu yang merangkumi diskriminasi terhadap pekerja, peningkatan tempoh cuti bersalin, larangan pemberhentian kerja atas sebab kehamilan, waktu kerja fleksible dan cuti paterniti.

Cadangan pindaan terhadap Akta Kerja 1955 dilakukan setelah sesi libat urus (*engagement*) yang menyeluruh diadakan bersama pihak-pihak berkepentingan termasuklah secara atas talian bagi mendapatkan pelbagai pandangan untuk diambil kira dalam pindaan Akta Kerja 1955.

Selain itu, sebuah Jawatankuasa Teknikal bagi pindaan Akta Kerja 1955 turut ditubuhkan di bawah Majlis Penasihat Buruh Kebangsaan. Mesyuarat Jawatankuasa telah pun mengadakan mesyuarat bagi meneliti dan memperinci cadangan pindaan ke atas Akta ini.

Untuk makluman Tuan Yang Di Pertua dan Ahli Dewan, pencari kerja (*job seekers*) tidak dilindungi di bawah Akta Kerja 1955 kerana Akta ini hanya meliputi pekerja yang telah memasuki atau menjalin hubungan pekerjaan (*employment relationship*) dengan seorang majikan, di mana satu hubungan pekerjaan secara '*Contract of Service*' telah diwujudkan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG CHEN [SUBANG]

TARIKH : 11 NOVEMBER 2021 (KHAMIS)

SOALAN

TUAN WONG CHEN minta **MENTERI KESIHATAN** menyatakan adakah Kementerian berhasrat untuk memberi suntikan vaksin kepada kanak-kanak yang berusia 5 hingga 12 tahun dan sekiranya Kementerian berhasrat, bilakah ini akan bermula.

JAWAPAN

Tuan Yang di-Pertua,

1. Jawatankuasa Pemilihan Calon Vaksin COVID-19 (JKPCV) masih dalam proses pengumpulan bukti saintifik dari segi keberkesanan dan keselamatan bagi penggunaan vaksin *COVID-19* bagi kanak- kanak berumur 5 hingga 12 tahun ke bawah termasuk hasil dapatan kajian klinikal mahupun *Real World Data*. Selain daripada itu perbincangan di antara JKPCV bersama panel pakar perubatan pediatrik akan dilaksanakan pada 9 November 2021 bagi mengenalpasti indikasi klinikal berdasarkan bukti saintifik yang tersedia.

2. Seterusnya, KKM akan mula melaksanakan program vaksinasi bagi kanak-kanak berumur 12 tahun ke bawah pada tahun 2022. Buat masa ini, hanya vaksin COVID-19 Pfizer BioNTech COMIRNATY® yang tersedia bagi kegunaan kanak-kanak bawah 12 tahun dan sedang menunggu kelulusan regulatori daripada EU dan AS. Pihak Pfizer juga dijangka akan mengemukakan data-data berkaitan pendaftaran penggunaan vaksin untuk kanak2 di bawah 12 tahun pada penghujung tahun ini kepada NPRA untuk penilaian dan kelulusan pendaftaran.

3. Kerajaan Malaysia kini sedang dalam proses untuk melaksanakan perolehan baharu bagi vaksin COVID-19 Pfizer BioNTech COMIRNATY® untuk kegunaan imunisasi kanak-kanak bawah 12 tahun memandangkan formulasi yang digunakan adalah berbeza daripada formulasi yang digunakan untuk populasi dewasa (tertakluk kepada kelulusan NPRA dan PBKD). Adalah dijangkakan seramai 5.9 juta kanak-kanak akan divaksinasi melibatkan anggaran keperluan kuantiti sebanyak 11.8 juta dos.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : DATO' ABDULLAH SANI BIN ABDUL HAMID
[KAPAR]**

TARIKH : 11 NOVEMBER 2021 (KHAMIS)

SOALAN

DATO' ABDULLAH SANI BIN ABDUL HAMID [KAPAR] minta **MENTERI SUMBER MANUSIA** menyatakan apakah komitmen Kerajaan terhadap isu peluang pekerjaan yang tidak seiring dengan kadar kelayakan akademik terutamanya terhadap golongan graduan.

JAWAPAN

Tuan Yang Di Pertua,

Isu peluang pekerjaan yang tidak seiring dengan kelayakan akademik terutama terhadap golongan graduan boleh diatasi dengan mengaplikasikan analisis data keperluan tenaga mahir. Antara maklumat keperluan tenaga mahir yang perlu dianalisis adalah jenis dan bidang kemahiran, kepakaran, tahap kelayakan dan bilangan yang diperlukan oleh industri.

Dalam hal ini, Kerajaan melalui Talent Corporation Malaysia Berhad (TalentCorp) giat memberi penekanan kepada peningkatan kebolehpasaran graduan dengan mengaplikasikan penggunaan Senarai Pekerjaan Kritikal (*Critical Occupation List - COL*) yang bertujuan untuk mengenalpasti kemahiran dan pekerjaan yang sukar dipenuhi merangkumi keperluan tenaga kerja mahir dan separa mahir merentasi sektor-sektor utama negara.

COL digunakan sebagai instrumen dalam membantu meningkatkan kebolehpasaran graduan seperti penentuan kesesuaian kursus baharu di universiti awam dengan keperluan industri, program pembangunan kemahiran tenaga kerja serta pengurusan biasiswa Kerajaan bertujuan mengimbangi penawaran dan permintaan dalam pasaran tenaga kerja.

Selain itu, TalentCorp juga bekerjasama dengan Kementerian Pengajian Tinggi dan menjadi Ahli Jawatankuasa Mesyuarat Saringan Awal bagi menyemak silibus kursus baharu di universiti awam. Semakan ini mengambil kira input daripada kajian COL yang mengetengahkan tren terkini dan masa hadapan pasaran buruh.

TalentCorp juga telah membentuk Badan Penasihat Industri dan Bakat (*Industry-Talent Advisory Council - InTAC*) yang dianggotai oleh industri serta wakil-wakil dari bahagian pembangunan modal insan merentasi sektor ekonomi. InTAC memfokuskan usaha untuk menambahbaik serta memperkasakan tiga (3) elemen utama iaitu pekerjaan dan pasaran pekerjaan (*employability & job market opportunity*), mengurangkan jurang

perbezaan kemahiran (*skills-bridging*) dan pekerjaan masa hadapan (*future of work*). Input daripada InTAC ini akan dimanfaatkan sepenuhnya dalam merancang dan membangunkan program-program yang berkualiti serta berdaya saing dalam merangsang pasaran pekerjaan dan ekonomi negara.

Di samping itu, Program Latihan Industri Berstruktur (SIP) turut dirangka dan dilaksanakan oleh TalentCorp untuk menyediakan mahasiswa dengan pengalaman kerja yang sebenar melalui latihan amali yang berkualiti. Melalui SIP ini, syarikat akan memainkan peranan yang lebih proaktif dalam membangun dan menyediakan bakat dengan kemahiran yang tepat bagi memastikan mereka menamatkan pengajian dengan kemahiran yang relevan dengan industri. Program SIP ini dilihat sebagai satu langkah intervensi yang memberi ruang kepada mahasiswa menimba pengalaman dalam alam pekerjaan dan mempraktikkan apa yang telah dipelajari sebelum mereka memulakan kerjaya.

Kerajaan melalui Jabatan Pembangunan Kemahiran (JPK) juga telah memperkenalkan dan melaksanakan Sistem Latihan Dual Nasional (SLDN) yang berkonsepkan *Work-Based Learning (WBL)*. Ia merupakan pembelajaran dalam persekitaran kerja sebenar melalui kemahiran *hands-on* kepada aktiviti kerja di syarikat. Latihan SLDN membabitkan dua (2) situasi pembelajaran iaitu 70 hingga 80 peratus latihan praktikal di syarikat SLDN dan 20 hingga 30 peratus latihan teori di Pusat Latihan SLDN.

Program SLDN ini menjadi platform komprehensif kepada mahasiswa yang berhasrat mengembangkan kepakaran melalui perolehan kemahiran teknikal, sosial dan kemanusiaan melalui sosialisasi di tempat kerja sebenar. Program SLDN turut menawarkan prospek kerjaya menarik yang merangkumi bidang pekerjaan utama di Malaysia berasaskan Standard Kemahiran Pekerjaan Kebangsaan (SKPK) yang menggariskan kompetensi atau kemahiran diperlukan bagi pekerjaan mengikut sektor.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 11 NOVEMBER 2021 (KHAMIS)

SOALAN

TUAN SYED IBRAHIM BIN SYED NOH [LEDANG] minta **MENTERI
PEMBANGUNAN LUAR BANDAR** menyatakan:

- (a) perancangan Kementerian dalam usaha transformasi Pusat Komuniti Desa (PKD) berpandukan perancangan RMK-12; dan
- (b) kriteria-kriteria pemilihan lokasi bagi membina Pusat Komuniti Desa (PKD) dalam satu-satu kawasan luar bandar.

JAWAPAN

- a) Untuk makluman Yang Berhormat, perancangan Kementerian dalam usaha tranformasi Pusat Komunti Desa (PKD) berpandukan RMK-12 adalah seperti berikut:
 - (i) premis PKD akan dimanfaatkan sepenuhnya untuk mengalakkan interaksi sosial dengan mempergiatkan lagi aktiviti yang mengalakkan kesepaduan sosial, perpaduan, patriotism dan kesukarelawan dengan kerjasama sektor swasta dan Pertubuhan Masyarakat Sivil (CSO) sejajar dengan Strategi : Memperkukuhkan Kerjasama antara Pihak Berkepentingan;
 - (ii) kemudahan internet di PKD termasuk PKD di negeri Sabah dan Sarawak dengan kelajuan sekurang-kurangnya 8Mbps untuk menikmati perkhidmatan atas talian, pembelajaran secara atas talian dan penajaan pendapatan/pengembangan perniagaan

melalui teknologi digital/platform e-dagang dalam bidang keusahawanan selaras dengan penetapan Strategi : Mempercepat Penyediaan Infrastruktur dan Perkhidmatan;

- (iii) PKD juga turut akan diperkasakan melalui transformasi sebagai Pusat Digital Keluarga Malaysia agar dapat memberi perkhidmatan yang lebih baik dan bersepadu bagi merapatkan jurang digital terutama antara luar bandar dan bandar; dan
- (iv) PKD turut memperluaskan peranan dan fungsi sedia ada termasuk menjalankan kerjasama strategi dengan POS Malaysia sebagai pusat pengumpulan pos bagi memudahcara aktiviti sosioekonomi selari dengan Strategi: Memajukan Pembangunan Luar Bandar.

b) Kriteria-kriteria pemilihan lokasi bagi membina Pusat Komuniti Desa (PKD) dalam satu-satu kawasan luar bandar adalah seperti berikut:

- (i) mempunyai peruntukan dan perjawatan yang mencukupi untuk mewujudkan PKD baharu;
- (ii) terletak di kawasan luar bandar dan tiada PKD di kawasan Parlimen berkaitan;
- (iii) status tanah dan bangunan adalah sama ada milik Kerajaan Negeri atau Persekutuan; dan
- (iv) capaian perkhidmatan yang terhad di kawasan setempat disebabkan kekurangan pengangkutan dan kemudahan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB PUAN KASTHURIRAANI A/P PATTO
[BATU KAWAN]**

TARIKH : 11 NOVEMBER 2021 (KHAMIS)

SOALAN

YB PUAN KASTHURIRAANI A/P PATTO minta **MENTERI PERPADUAN NEGARA** menyatakan apakah mekanisme penyaluran dana MITRA kepada NGO, apakah ukuran KPI projek tersebut dan bagaimana MITRA dapat memastikan dana ini tidak disalurkan kepada parti politik di masa kini dan masa hadapan.

JAWAPAN

Yang Di-Pertua,

1. **Kerajaan telah memperuntukkan geran berjumlah RM100 juta setahun** bagi pelaksanaan program-program peningkatan sosioekonomi dan taraf hidup masyarakat India terutamanya golongan B40 di bawah **Program Pembangunan Sosioekonomi Masyarakat India (PPSMI)**.

2. Pelaksanaan PPSMI meliputi 3 kluster program seperti berikut:

- a) **Program Pembangunan Modal Insan;**
- b) **Program Pembangunan Keusahawanan dan Kerjaya; dan**
- c) **Program Pembangunan Sosial dan Kebajikan, Kerohanian dan Kesejahteraan.**

3. Setelah pentadbiran MITRA diletakkan di bawah Kementerian Perpaduan Negara (KPN), tindakan **penambahbaikan terhadap prosedur pemberian geran peruntukan MITRA telah dilaksanakan sebagaimana berikut:**

a) Penyediaan **Garis Panduan Pengurusan Geran Kewangan MITRA** yang telah diluluskan oleh Kementerian Kewangan Malaysia (MOF); dan

b) Penubuhan **2 buah jawatankuasa iaitu:**

i. **Jawatankuasa Penilaian Program MITRA**

- Dipengerusikan oleh Ketua Setiausaha KPN.
- Bertanggungjawab untuk mempertimbang dan memutuskan perakuan oleh Jawatankuasa Tapisan MITRA.

ii. **Jawatankuasa Pemantauan Program MITRA**

- Dipengerusikan oleh Ketua Setiausaha KPN.
- Bertanggungjawab untuk memantau dan memastikan program-program dilaksanakan mengikut syarat yang ditetapkan kerajaan.

4. Kelulusan geran kewangan diberikan kepada permohonan yang menepati **Garis Panduan Pengurusan Geran Kewangan MITRA** tanpa mengambil kira **latar belakang parti politik atau Badan Bukan Kerajaan (NGO).**

5. Manakala bagi tujuan **pengukuran pencapaian KPI bagi setiap program yang telah diluluskan**, penerima geran kewangan dikehendaki untuk mengemukakan laporan kepada **Jawatankuasa Pemantauan Program MITRA** dipengerusikan oleh **Ketua Setiausaha.**

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG KAH WOH
[IPOH TIMUR]**

TARIKH : 11 NOVEMBER 2021 (KHAMIS)

SOALAN

TUAN WONG KAH WOH minta **MENTERI KESIHATAN** menyatakan sama ada Kerajaan telah/dalam proses pembelian COVID *antiviral pill* dan apakah status terkini. Apakah langkah yang diambil oleh Kementerian untuk mengelakkan pembelian yang terlambat.

JAWAPAN

Tuan Yang di-Pertua,

1. Untuk makluman, Syarikat Merck Sharp & Dohme (MSD) (Malaysia) Sdn. Bhd. telah berkongsi data kajian klinikal fasa III (MOVE-OUT) melalui satu mesyuarat bersama Kementerian Kesihatan pada 5 Ogos 2021. Berdasarkan data awal kajian klinikal yang telah dijalankan di 82 tapak kajian melibatkan 14 buah negara, ubat antiviral Molnupiravir telah menunjukkan pengurangan risiko sehingga 50% untuk kemasukan ke hospital atau kematian, berbanding dengan *placebo*.
2. Pada 28 September 2021, Syarikat Merck Sharp & Dohme (MSD) (Malaysia) Sdn. Bhd. telah membentangkan kepada Kementerian Kesihatan tentang cadangan penggunaan ubat oral antiviral Molnupiravir dalam rawatan COVID-19.
3. Lanjutan itu, pada 7 Oktober 2021, Kementerian Kesihatan telah menandatangani *Letter of Undertaking* dengan syarikat MSD bagi mendapatkan 150,000 *courses* ubat oral antiviral Molnupiravir.
4. Sehingga 11 November 2021, Merck Sharp & Dohme (MSD) (Malaysia) Sdn. Bhd. masih belum mengemukakan permohonan pendaftaran produk kepada Bahagian Regulatori Farmasi Negara (NPRA), Kementerian Kesihatan. Walau bagaimanapun, satu mesyuarat antara NPRA dan MSD telah diadakan pada 9 November 2021 untuk membincangkan mengenai dokumen-dokumen pendaftaran produk.

Tuan Yang di-Pertua,

5. Menyedari akses kepada ubat/ vaksin COVID-19 adalah sangat penting dan mendesak dalam keadaan pandemik ini, satu laluan baharu pendaftaran bersyarat khas untuk rawatan COVID-19 telah diwujudkan untuk produk farmaseutikal yang baharu untuk digunakan semasa bencana. Mesyuarat Pihak Berkuasa Kawalan Dadah (PBKD) yang ke-351 pada 3 Disember 2020, NPRA telah mengeluarkan satu direktif beserta dokumen panduan berkaitan **proses pendaftaran bersyarat**

bagi produk farmaseutikal (termasuk vaksin) semasa tempoh bencana seperti di laman web rasmi NPRA.

6. **Syarat kelayakan** bagi permohonan pendaftaran bersyarat adalah:

- (a) Produk digunakan untuk penyakit yang serius dan mengancam nyawa serta berpotensi menyebabkan pandemik;
- (b) Produk (ubat atau vaksin) sedia ada berdaftar belum berjaya membasmi penyakit atau mencegah pandemik;
- (c) Produk mestilah sekurang-kurangnya sedang menjalani kajian klinikal Fasa III yang mempunyai data awal berkaitan keselamatan dan keberkesanan berdasarkan sekurang-kurangnya satu kajian klinikal Fasa III yang telah dirancang dengan baik yang menunjukkan keselamatan dan keberkesanan produk farmaseutikal dengan jelas; dan
- (d) Produk telah berdaftar / diberi *emergency use authorization* oleh badan regulatori negara pengeluar ATAU badan regulatori rujukan oleh PBKD ATAU Pertubuhan Kesihatan Sedunia (WHO).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : DATUK SERI HAJI SALAHUDDIN BIN AYUB
[PULAI]**

TARIKH : 11 NOVEMBER 2021 (KHAMIS)

SOALAN

DATUK SERI HAJI SALAHUDDIN BIN AYUB [PULAI] minta **MENTERI DALAM NEGERI** menyatakan apakah usaha Kerajaan dalam menangani aktiviti dan pemikiran ekstrimis berasaskan agama.

JAWAPAN

Tuan Yang Di Pertua,

PDRM menerusi Cawangan Khas secara berterusan komited membuat pemantauan dan risikan dalam menangani aktiviti dan pemikiran ekstremis berasaskan agama. Selain itu, PDRM juga bekerjasama dengan pelbagai agensi yang berkaitan khususnya melibatkan agama untuk melaksanakan usaha-usaha untuk mencegah dan menangani penularan pemikiran ekstremis atau fahaman pelampau berasaskan agama yang boleh berkembang dengan menggunakan elemen keganasan.

Sebagaimana Muzakarah Jawatankuasa Fatwa Majlis Kebangsaan Bagi Hal Ehwal Ugama Islam Malaysia (MKI) pada 5 Mei 1996, telah diputuskan pandangan hukum supaya umat Islam di negara ini berpegang kepada manhaj Ahli Sunnah wal-Jamaah sama ada dari segi akidah, syariah mahupun akhlak. Dalam rangka untuk membendung penularan ajaran sesat dan menyeleweng, pihak JAKIM sentiasa memberi tumpuan kepada

program-program memperkuat akidah ummah melalui pembudayaan ilmu dan pentarbiahan yang komprehensif dan berkesan dengan kerjasama Majlis Agama Islam Negeri (MAIN) dan Jabatan Agama Islam Negeri (JAIN). Beberapa pendekatan bersepadu antara JAKIM, MAIN, JAIN dan PDRM yang telah, sedang dan akan dilaksanakan untuk menangani isu ajaran sesat dan penyelewengan akidah umat Islam di Malaysia ialah:

- (i) Bekerjasama dengan MAIN dan JAIN dalam aspek penyelidikan mengenai ajaran dan doktrin yang meragukan atau disyaki menyeleweng daripada agama Islam;
- (ii) Mengadakan pertemuan dan sesi dialog secara tertutup bersama kumpulan atau individu yang terlibat dengan ajaran yang meragukan;
- (iii) Melaksanakan kajian secara menyeluruh dalam pelbagai aspek sebelum sesuatu ajaran atau doktrin itu diberi pandangan hukum oleh Muzakarah Majlis Kebangsaan Bagi Hal Ehwal Ugama Islam Malaysia (MKI). Ini termasuk kajian dari sudut kesan dan implikasi apabila sesuatu pandangan hukum mengenai ajaran sesat dikeluarkan;
- (iv) Jabatan Mufti di negeri mengeluarkan fatwa mengenai ajaran terbabit mengikut peruntukan dan bidang kuasa masing-masing berpandukan kepada pandangan hukum oleh Muzakarah MKI dan perbincangan di peringkat Jawatankuasa/Muzakarah Fatwa Negeri-Negeri;
- (v) Memberi kaunseling agama kepada mereka yang terlibat bagi membantu mengembalikan akidah dan kehidupan mereka kepada kehidupan normal masyarakat; dan
- (vi) Melaksanakan pelbagai program, wacana, khutbah, penerbitan ilmiah, pengajian guru takmir di masjid-masjid, kafa, sesi pemulihan dan kerjasama bersama agensi-agensi berkaitan.

Tuan Yang Dipertua,

Selain daripada usaha-usaha pemantauan, pengumpulan maklumat risikan dan penguatkuasaan yang berterusan ini, usaha mengekang ancaman aktiviti dan pemikiran ekstremis berasaskan agama ini juga perlu dimulakan secara holistik. Sekiranya tidak dibendung dari awal, fahaman pelampau ini berisiko menggunakan elemen keganasan. Justeru, Kementerian Dalam Negeri telah mengorak langkah untuk membangunkan Pelan Tindakan Kebangsaan Bagi Mencegah Dan Menangani Fahaman Pelampau Keganasan (*National Action Plan to Prevent and Counter Violent Extremism*, NAPPCVE).

Pelan ini dalam proses kajian dan akan dilancarkan selewat-lewatnya pada tahun hadapan. Diharapkan, melalui pelan tindakan kebangsaan ini, usaha mencegah fahaman pelampau keganasan dari meresapi minda rakyat Malaysia dapat dilakukan bermula di akar umbi. Pelan ini akan menjadikan usaha pencegahan fahaman pelampau keganasan dilaksanakan secara sistematik dan berstruktur di kalangan semua agensi kerajaan dengan penglibatan komuniti.

**PERTANYAAN DEWAN RAKYAT YANG KEEMPAT BELAS
PENGAL YANG KEEMPAT, MESYUARAT KEDUA
KEMENTERIAN PERPADUAN NEGARA**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 11 NOVEMBER 2021 (KHAMIS)

SOALAN

minta **MENTERI PERPADUAN NEGARA** menyatakan strategi Kerajaan bagi membangunkan masyarakat madani yang memiliki semangat kerohanian yang baik dan melahirkan masyarakat yang memiliki toleransi tinggi sekaligus dapat menjamin keharmonian sejagat.

JAWAPAN

1. Kementerian Perpaduan Negara (KPN) telah melancarkan **Dasar Perpaduan Negara (DPN)** yang merupakan **dasar payung negara** dalam memupuk, mengukuh, serta memelihara perpaduan di kalangan rakyat melalui tiga (3) teras utama iaitu:

- a) Patriotisme dan demokrasi;
- b) Identiti nasional; dan
- c) ekosistem perpaduan negara.

2. **Strategi-strategi dasar ini disokong oleh Rangka Tindakan (Blueprint) Perpaduan Negara 2021-2030** yang menggariskan anjakan strategik bagi memacu pelaksanaan strategi dan mencapai objektif DPN seperti berikut:

- a) **mengukuhkan perpaduan dan integrasi nasional** berteraskan Perlembagaan Persekutuan dan Rukun Negara;
- b) **membentuk identiti nasional dengan semangat jati diri, patriotik, prihatin, toleransi, saling menghormati dan bertanggungjawab**; dan
- c) **melahirkan rakyat Malaysia yang menghargai dan mengamalkan perpaduan.**

3. Bagi memastikan perancangan strategik dan pelaksanaan inisiatif perpaduan negara yang bersepadu dan menyeluruh, Kementerian Perpaduan Negara menghasilkan pelan-pelan tindakan yang mencakupi kesemua jentera perpaduan dan melibatkan setiap peringkat dan lapisan masyarakat:

- a) **Kanak-kanak pra sekolah, murid sekolah dan pelajar institut pengajian tinggi**

Pelan Pendidikan Awal Kanak-Kanak Tabika Perpaduan 2021-2030 ini, Tabika Perpaduan akan **dapat memainkan peranannya dengan lebih berkesan, sekaligus mencapai objektif penubuhan Tabika Perpaduan** iaitu:

- i. Membentuk murid yang mempunyai semangat patriotisme dan semangat perpaduan:**
 - a. Murid dapat menunjukkan semangat cintakan negara.
 - b. Murid dapat meraikan kepelbagaian kaum dan etnik yang ada di negara kita.
- ii. Membentuk kemenjadian murid dan memperkembangkan konsep sendiri:**
 - a. Murid berpotensi untuk berfikir secara kritis dan kreatif serta responsif dalam sesi pembelajaran.
 - b. Murid menampilkan peribadi dan perwatakan yang positif.
- b) Pemantapan Modul Pengurusan dan Program Kelab Rukun Negara (KRN) di peringkat sekolah dan Sekretariat Rukun Negara (SRN)**

Bagi meningkatkan penghayatan pendidikan Rukun Negara di kalangan pelajar bertunjangkan kepada pengetahuan, pemahaman, penghayatan dan pengamalan Rukun Negara untuk meningkatkan patriotisme dan perpaduan.

c) Komuniti

Dalam usaha memperkukuhkan peranan Komuniti Rukun Tetangga (KRT) sebagai jentera perpaduan di peringkat komuniti, Kementerian Perpaduan Negara telah menghasilkan **Pelan Pemerkasaan Kepimpinan Komuniti Rukun Tetangga 2021-2030 dengan objektif untuk:**

- i. Memperkukuhkan peranan dan tanggungjawab kepimpinan komuniti RT;
- ii. Memantapkan program perpaduan dan kesejahteraan komuniti RT; dan
- iii. Meningkatkan penglibatan aktif komuniti dalam aktiviti kesukarelawan RT

Agenda Kerja Komuniti Rukun Tetangga @ RT4ALL juga telah dihasilkan sebagai panduan pelaksanaan gerak kerja oleh KRT. Pelbagai program telah disusun bertujuan meningkatkan kesejahteraan, keselamatan dan keharmonian masyarakat melalui **empat (4) Gerak Kerja** berikut:

- i. Gerak Kerja KRT Sejahtera;
- ii. Gerak Kerja KRT Selamat;
- iii. Gerak Kerja KRT Bersih dan Indah; dan
- iv. Gerak Kerja KRT Sihat.

d) Badan Bukan Kerajaan

Kementerian Perpaduan Negara juga melaksanakan kerjasama strategik dengan Badan Bukan Kerajaan (NGO) serta mengiktiraf peranan mereka dalam melaksanakan inisiatif dan program perpaduan selari dengan konsep inklusiviti yang ditekankan.

Untuk itu, Kementerian sedang membangunkan **Pelan NGO Rakan Perpaduan (*Friends of Unity*)**. Penghasilan pelan ini adalah bagi memastikan NGO dapat memainkan peranan yang lebih berkesan untuk sama-sama menjayakan program perpaduan di segenap lapisan masyarakat.

4. KPN juga akan melancarkan pelan tindakan berikut sebagai asas dan panduan pelaksanaan inisiatif perpaduan Keluarga Malaysia:

- a) **Pelan Tindakan Perpaduan Negara (PTPN) 2021-2030** - merupakan pelan tindakan Kementerian yang bersifat spesifik, inklusif dan holistik dalam mengukuhkan perpaduan; dan
- b) **KAMI @Pelan Perpaduan Keluarga Malaysia** – memfokuskan kepada prinsip dan pendekatan dalam usaha ke arah pembinaan masyarakat yang harmoni dan sejahtera, sebagai satu Keluarga Malaysia yang bersatu padu dan bertoleransi berteraskan 4 rukun KAMI iaitu:
 - i. **KARIB** - meningkatkan penglibatan peranan keluarga serta institusi pendidikan bagi membina keakraban dalam perpaduan;
 - ii. **AKSESIBILITI** - meningkatkan dan menaik taraf kemudahan sosial awam di KRT bagi memperkasa pelaksanaan program-program perpaduan di KRT;
 - iii. **MAJMUK** - memberikan pendedahan kepada masyarakat tentang kepelbagaian bahasa, semangat patriotisma dan kenegaraan serta meningkatkan pemahaman kepelbagaian agama kepada masyarakat; dan
 - iv. **INKLUSIVITI** - pelaksanaan aktiviti sukan di antara kaum yang akan mewujudkan sikap terbuka, altruisme, dan penerimaan budaya serta kepelbagaian etnik.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN GOBIND SINGH DEO (PUCHONG)

TARIKH : 11 NOVEMBER 2021 (KHAMIS)

SOALAN

TUAN GOBIND SINGH DEO [PUCHONG] minta **MENTERI DALAM NEGERI** menyatakan bilangan sabitan kesalahan dengan hukuman mati sejak 2018 dan sama ada Kerajaan akan memansuhkan hukuman mati dan sekiranya ya, bila.

JAWAPAN

Tuan Yang Di Pertua,

Untuk makluman Ahli Yang Berhormat, rekod Jabatan Penjara Malaysia sehingga 13 Oktober 2021 menunjukkan bahawa terdapat seramai **1,359** banduan yang telah disabitkan bersalah oleh Mahkamah dan dijatuhkan hukuman mati. Walau bagaimanapun, hukuman mati tersebut belum dapat dilaksanakan kerana **509** orang banduan masih lagi dalam proses rayuan di peringkat Mahkamah Rayuan dan Persekutuan, manakala **850** orang dalam proses rayuan kepada Lembaga Pengampunan Negeri.

Seramai 833 banduan dari jumlah tersebut adalah rakyat Malaysia dan 526 banduan pula adalah warganegara asing daripada 41 buah negara. Banduan berkenaan terlibat dengan kesalahan di bawah pelbagai Akta seperti kesalahan di bawah seksyen 302 Kanun Kesiksaan (membunuh), seksyen 39B Akta Dadah Berbahaya (pengedaran dadah), seksyen 121 Kanun Kesiksaan (berperang dengan Yang DiPertuan Agong), seksyen 3

serta 7 Akta Senjatapi (melepaskan tembakan di bawah kesalahan berjadual dan berdagang senjatapi), seksyen 3 Akta Culik , seksyen 396 Kanun Kesiksaan (rompakan berkumpulan dan pembunuhan) dan seksyen 57 (1)(A) Akta Keselamatan Dalam Negeri (kesalahan melibatkan senjatapi dan bahan letupan).

Untuk makluman Dewan yang mulia ini, Kerajaan bersedia untuk mempertimbangkan komitmen kepimpinan terdahulu bagi memansuhkan hukuman mati mandatori dan syor hukuman gantian dengan budi bicara Mahkamah.

Dalam hal ini, Laporan Akhir Hukuman Gantian Terhadap Hukuman Mati Mandatori yang telah disediakan oleh Jawatankuasa Khas Kajian Hukuman Gantian Terhadap Hukuman Mati Mandatori mengandungi antara lain, syor-syor hukuman gantian terhadap 11 kesalahan yang membawa hukuman mati mandatori, kesalahan di bawah Akta Dadah Berbahaya 1952 [Akta 234] dan 21 kesalahan yang membawa hukuman mati tetapi dengan budi bicara Mahkamah.

Melalui kajian yang sama, buat julung kalinya juga polisi penghukuman dalam sistem keadilan di negara ini telah disemak dan dikaji semula. Ia merupakan penambahbaikan kepada "*criminal justice system*" di mana Jawatankuasa Khas telah mengesyorkan hukuman gantian yang bersifat adil dan setimpal dengan kesalahan jenayah yang telah dilakukan.

Secara umumnya, laporan ini dijangka dibentangkan kepada Jemaah Menteri dalam masa terdekat. Sebarang tindakan susulan adalah tertakluk kepada keputusan Kerajaan berkaitan Kajian Hukuman Gantian Terhadap Hukuman Mati Mandatori dan syor-syor yang dinyatakan dalam laporan tersebut. Pertimbangan dan keputusan Kerajaan terhadap kajian ini akan turut mengambil kira kepentingan dan kemaslahatan rakyat secara keseluruhan termasuk aspek berkaitan pencegahan jenayah, kesan yang dihadapi oleh keluarga mangsa serta kesedaran kepada orang awam.